

四庫全書薈要

• 乾隆御覽本

經部

欽定四庫全書薈要

經部
爾雅注疏卷一

詳校官主事銜臣徐以坤



爾雅注疏

目錄

爾雅注解傳述人

爾雅注疏序

爾雅注序

卷一

釋詁

卷二

釋言

卷三

釋訓

釋親

卷四

釋官

釋器

卷五

釋樂

釋天

卷六

釋地

釋土

卷七

釋山

釋水

卷八

釋草

卷九

釋木

釋蟲

卷十

釋魚

釋鳥

卷十一

釋獸

釋畜

臣等謹案爾雅注疏十一卷晉郭璞注宋邢
昺等疏治爾雅者自捷為文學而下共十餘
家璞蒼萃為注陸德明謂其治聞強識為世
所重自是以後為解義者甚多釋文而外傳
者甚少晁公武曰舊有孫炎高璉疏以其淺
略命昺等別著此書其後若陸佃之埤雅羅

願之爾雅翼又因邢疏而廣之者也明刻本
不載釋文今補入又取鄭樵注本參校是正
為多皆乾隆四年奉

勅校定本也乾隆四十年二月恭校上

總纂官臣紀昀陸錫熊臣孫士毅

總校官臣陸費墀

爾雅注疏目錄

爾雅注疏卷首

爾雅注解傳述人

爾雅注疏序

爾雅注序

爾雅注解傳述人

唐國子博士兼太子中允贈齊州刺史吳縣開國男陸德明錄
爾雅者所以訓釋五經辯章同異實九流之通路百
氏之指南多識鳥獸草木之名博覽而不惑者也爾
近也雅正也言可近而取正也釋詁一篇蓋周公所
作釋言以下或言仲尼所增子夏所足叔孫通所益
梁文所補張揖論之詳矣前漢終軍始受豹鼠之賜
自茲迄今斯文盛矣先儒多為億必之說乖蓋闕之

義惟郭景純洽聞強識詳悉古今作爾雅注為世所

重今依郭本為正捷為文學注三卷

一云捷為郡文學卒史臣舍人

漢武帝時待詔闕中卷

劉歆注三卷

與李巡注正同疑非歆注

樊光注六卷

京兆人後漢中散大夫沈旋疑非光注

李巡注三卷

汝南人後漢中黃門

孫炎注

三卷

音一卷

郭璞注三卷

字景純河東人東晉弘農太守著作郎音一卷圖贊二卷

梁有沈旋

子約之

集衆家之注陳博士施乾國子祭酒

謝嶠舍人顧野王並撰音既是名家今亦采之附於

先儒之末

爾雅注疏序

翰林侍講學士朝請大夫守國子祭酒上柱國賜紫金魚袋臣邢昺等奉勅校定

夫爾雅者先儒授教之術後進索隱之方誠傳注之濫觴為經籍之樞要者也夫混元闢而三才肇位聖人作而六藝斯興本乎發德於衷將以納民於善洎夫醇醜既異步驟不同一物多名繫方俗之語片言殊訓滯今古之情將使後生若為鑽仰繇是聖賢間出詁訓遞陳周公倡之於前子夏和之於後蟲魚草木

爰自爾以昭彰禮樂詩書盡由斯而紛郁然又時經
戰國運歷挾書傳授之徒寢微發揮之道斯寡諸篇
所釋世罕得聞惟漢終軍獨深其道豹鼠既辨斯文
遂隆其後相傳乃可詳悉其為注者則有捷為文學
劉歆樊光李巡孫炎雖各名家猶未詳備惟東晉郭
景純用心幾二十年注解方畢甚得六經之旨頗詳
百物之形學者祖焉最為稱首其為義疏者則俗間
有孫炎高璉皆淺近俗儒不經師匠今既奉勅校定

考案其事必以經籍為宗理義所詮則以景純為主
雖復研精覃思尚慮學淺意疏謹與尚書駕部員外
郎直祕閣臣杜鎬尚書都官員外郎祕閣校理臣舒
雅太常博士直集賢院臣李維諸王府侍講太常博
士兼國子監直講臣孫奭殿中丞臣李慕清大理寺
丞國子監直講臣王煥大理評事國子監直講臣崔
偓佺前知洺州永年縣事臣劉士玄等共相討論為
之疏釋雖上導睿旨共竭於顓蒙而下示將來尚慙

於疏略謹序

爾雅注疏序

爾雅注序

晉郭璞撰 唐陸德明音義 宋邢昺疏

爾雅序疏

爾雅者釋文云所以訓釋五經辨章同異實九流之通路百氏之指南多識鳥獸草

木之名博覽而不惑者也爾近也雅正也言可近而取正也釋詁一篇蓋周公所作釋言以下或言仲尼所增子夏所足叔孫通所益梁文所補張揖云昔在周公續述唐虞宗翼文武克定四海勤相成王踐阼理政日昃不食坐而待旦德化宣流越裳來貢嘉禾貫桑六年制禮以導天下著爾雅一篇以釋其義傳乎後學歷載五百墳典散落唯爾雅常存禮三朝記哀公曰寡人欲學小辯以觀於政其可乎孔子曰爾雅以觀於古足以辯言矣春秋元命包言子夏問夫子作春秋不以初哉首基為始何是以知周公所造

也率斯以降超絕六國越踰秦楚爰暨帝劉魯人叔
孫通撰置禮記文不違古今俗所傳三篇爾雅或言
仲尼所增或言子夏所益或言叔孫通所補或言是
沛郡梁文所著皆解家所說先師口傳既無正驗聖
人所言是故疑不能明也夫爾雅為書也文約而義
固其陳道也精研而無誤真七經之檢度學問之階
路儒林之楷素也序與緒音義同釋詁云叙緒也言
己注述之由敘陳此經之旨若繭之抽緒耳孔子作
書序子夏作詩序故郭氏亦謂之序序之大指凡有
五焉初自夫爾雅者至辯同實而殊號者也明此書
之用也二自誠九流之津涉至摘輪者之華苑也言
為羣經之樞要也三自若乃至莫近於爾雅言其博
物他書不之過也四自爾雅者至其業亦顯明其興
隆之時也五自英儒瞻聞之士至末總序己所以作
注之意也今
各依文解之

夫爾雅者所以通詁訓之指歸叙詩人之興詠總絕代

之離詞辯同實而殊號者也音義

夫音符爾字又作邇雅字亦作疋詁音古

又音故興許應反總子孔反

疏此明其用也夫者發語辭亦指示語指此爾雅者所以通詁訓之指歸也

詁古也通古今之言使人知也訓道也道物之貌以告人也指歸謂指意歸鄉也言此書所以通暢古今之言訓道百物之貌使人知其指意歸鄉也若言初哉首基者其指歸在始也若言番番矯矯者其指歸在勇也略舉一隅他皆放此云敘詩人之興詠者敘次敘也鄭玄注周禮大司樂云興者以善物喻善事又注大師云興者見今之美嫌於媚諛取善事以喻勸之鄭司農云興者托於事物詠者永言也故舜典云歌永言孔注云歌詠其義以長其言又詩序云言之不足故嗟歎之嗟歎之不足故詠歌之斯皆詩人所為此書能次序之故言

敘詩人之興詠也若言雍雍喑喑以興民協服也其虛
其徐以詠威儀容止也如此之類皆是案爾雅所釋偏
解六經而獨云敘詩人之興詠者以爾雅之作多為釋
詩故毛公傳詩皆據爾雅謂之詁訓傳蓋亦此意也云
總絕代之離詞者總聚也絕代謂遠代也離詞猶異詞
也郭璞序方言云標六代之絕語類離詞之指韻亦猶
此也以其六代絕遠四方乖越故今古語異夷夏詞殊
此書能總聚而釋之使人知也若其釋又祭也周曰釋
商曰彤夏曰復昨及注引方言之類是也云辯同實而
殊號者也者辯謂辯別事物雖殊其號而同一實者此
書辯之若繫謂之置置置也置謂之罕罕覆車也又釋
草云唐蒙女蘿女蘿免絲注云別四名如此之類是也

誠九流之津涉六藝之鈐鍵學覽者之潭奧擣翰者之

華苑也音義

鈐其廡反鍵字又作捷其展反字林巨偃
反銳也一曰鎡也廣雅云鍵牡也小爾雅

云鍵謂之鑰方言云鑰也自關而東陳楚之間謂鑰為
鍵或一音巨言反潭徒南反與烏報反搞勅知反說文
云舒也翰寒半反華疏此明其樞要也云誠九流之津
胡瓜反苑於阮反涉者誠實也九流者序六藝為
九種言於六經若水之下流也津涉者濟渡之處名言
九流之多非此書無以通喻九河之廣非津涉無以渡
案漢書藝文志云儒家者流五十三家八百三十五篇
蓋出於司徒之官助人君順陰陽明教化者也游文於
六經之中留意於仁義之際祖述堯舜憲章文武宗師
仲尼以重其言於道最為高孔子曰如有所譽其有所
試唐虞之隆殷周之盛仲尼之業已試之效者也然惑
者既失精微而僻者又隨時抑揚違離道本苟以譁衆
取寵後進循之是以五經乖析儒學寢衰此僻儒之患
也道家者流三十七家九百九十三篇蓋出於史官歷
記成敗存亡禍福古今之道然後知秉要執本清虛以
自守卑弱以自持此人君南面之術也合於堯舜之克

讓易之謙謙一謙而四益此其所長也陰陽家者流二十一家三百六十九篇蓋出於義和之官敬順昊天歷象日月星辰敬授民時此其所長也法家者流十二家二百一十七篇蓋出於理官信賞必罰以輔禮制易曰先王以明罰勅法此其所長也名家者流七家三十六篇蓋出於禮官古者名位不同禮亦異數孔子曰必也正名乎名不正則言不順言不順則事不成此其所長也墨家者流六家八十六篇蓋出於清廟之守茅屋采椽是以貴儉養三老五更是以兼愛選士大射是以尚賢宗祀嚴父是以右鬼順四時而行是以非命以孝視天下是以上同此其所長也從橫家者流十二家百七篇蓋出於行人之官孔子曰誦詩三百使於四方不能專對雖多亦奚以為又曰使乎使乎言其當權事制宜受命而不受辭此其所長也雜家者流二十家四百三篇蓋出於議官兼儒墨合名法知國體之有此見王治之無不貫此其所長也農家者流九家百一十四篇蓋

出於農耨之官播百穀勸耕桑以足衣食故八政一曰食二曰貨孔子曰所重民食此其所長也此九流之大旨也云六藝之鈴鍵者案漢書藝文志六藝謂易書詩禮樂春秋六經也凡六藝一百三家三千一百二十三篇說文鈴鑠也方言云戶鑰自關之東陳楚之間謂之鍵小爾雅云鍵謂之鑰言此書為六藝之鑠鑰必開導之然後得其微旨也故云六藝之鈴鍵也云學覽者之譚輿者譚淵也室中西南隅謂之輿言隱輿也此書釋二儀之形象載八表之昏荒雖博學廣覽之士莫能究淵深隱輿故云學覽者之譚輿也云搞翰者之華苑也者言此書森羅萬有純粹六經摛文染翰之士凡以掇其英華若園苑然故云華苑也

若乃可以

博物不惑多識於鳥獸草木之名者莫近於爾雅音義

近如字又音

疏

此言其博物也云若乃者因上起下語上既言其功用此復美其博物故云若

乃既可以博釋庶物又能多識辨於鳥獸草木之名者莫近於爾雅言爾雅最近之也案公羊傳說春秋功德云撥亂世反諸正莫近於春秋何休云莫近猶莫過之也然則博物多識他書亦莫過於爾雅也

爾雅

者蓋興於中古隆於漢氏豹鼠既辨其業亦顯音義

丁中

仲反又如字中古謂疏此言興隆之時也云蓋興於中周公也豹百教反古者爾雅之作經傳莫言其人

及時世但相傳云周公作之以教成王無正文故云蓋以疑之經典通以伏羲為上古文王為中古孔子為下

古周公文王子父統子業周公亦可為中古故云蓋興於中古云隆於漢氏者以夫子沒後書紀散亡戰國陵遲嬴秦燔滅則此書亦從而墜矣洎乎漢氏御宇旁求典籍除挾書之律開獻書之路此書亦從而隆矣故云隆於漢氏也云豹鼠既辨其業亦顯者謂漢武帝時孝廉郎終軍既辨豹文之鼠人服其博物故爭相傳授爾

雅之業於是遂顯言不但英儒瞻聞之士洪筆麗藻之興行兼亦廣顯故云亦也

客靡不欽玩耽味為之義訓璞不揆禱昧少而習焉沈

研鑽極二九載矣雖注者十餘然猶未詳備竝多紛謬

有所漏略是以復綴集異聞會稗舊說考方國之語采

謠俗之志錯綜樊孫博關羣言剷其瑕礫塞其蕭稂事

有隱滯援據徵之其所易了闕而不論別為音圖用祛

未寤輒復擁篲清道企望塵躅者以將來君子為亦有

涉乎此也音義

瞻時豔反玩五貫反耽丁南反璞普剗反揆巨癸反禱徒刀反禱杌也少詩照

反沈直金反研五堅反鑽子官反注之成反紛芳云反
謬靡幼反鄭注禮記云誤也方言云詐也本或作繆音
同復扶又反綴丁衛反又丁劣反會古外反周禮注云
計也本又作檜音同廣雅云檜收也稗子外反又子骨
反聚也謠音遙綜子宋反剗丁悅反說文云利也廣雅
云削也又都活反瑕戶加反玉翳也礫力的反說文云
小礪石寧字又作攪居展反又去虔反拔也蕭先遼反
根音郎狼童梁穢禾草也詩云不稂不莠隱於謹反滯
直例反援音袁引也易以鼓反了本亦作憭音同照察
也祛去魚反寤五故反簪字又作彗似稅反又囚醉反
一音息遂反說文云掃竹也企邱鼓反躅本又作躅直
錄反漢書音義躅迹也韋昭音擢云三輔謂牛蹄迹為
躅鄭氏音拘據案疏此言己所以作注之意也云英儒
字林據音竹足反瞻聞之士者案禮辭名記德過千
人曰英儒者柔也能以德柔服人也瞻多也士者有德
之稱言英俊通儒多聞之士也云洪筆麗藻之客者洪

大也麗美也藻水藻也有文以喻人之文章言大有詞
筆美於文章之客也云靡不欽玩耽味為之義訓者靡
無也欽玩猶敬愛也耽味猶樂嗜也言英儒等無不敬
愛此書如耽廣樂嗜嘉肴然故曰耽味而為之義理訓
解謂作注也云璞不揆禱昧少而習焉者此自謙也揆
度也禱謂禱杌無知之貌昧闇也郭氏言己不度其無
知闇昧自少小而習此書焉云沈研鑽極二九載矣者
此言用力深不敢苟為注解也謂深沈研覈鑽求窮極
凡十八載故云二九載矣云雖注者十餘然猶未詳備
者言作注者雖十有餘家猶尚未能精詳具備十餘家
者陸德明敘錄捷為文學注二卷劉歆注三卷樊光注
六卷李巡注三卷孫炎注三卷惟此五家而已又五經
正義援引有某氏謝氏顧氏今郭氏言十餘者典籍散
亡未知誰氏或云沈旋施乾謝潛顧野王者非也此四
家在郭氏之後故知非也云竝多紛縵有所漏略者言
十家所注竝多紛紜錯繆若孫叔然觀髣髴離字別為

義是紛謬也其所難解則全不入根節是漏略也云是以復綴集異聞會粹舊說者是以者因前起後語因前十家所注紛紛漏略起已作注之意故言是以對前已有注故云復綴集謂聯綴聚集異聞者注所引六經子史之類是也會粹者廣雅云會收也粹聚也舊說謂十家所說也雖不能盡善亦時有可觀其所善者則收聚用之也云考方國之語者考成也四方之國言語不同有可通釋者則援引考成之注引方言是也云采謠俗之志者采取也徒歌謂之謠案漢書地理志云好惡取舍動靜亡常隨君上之情欲故謂之俗但童謠嬉戲之言及俗間有所記志可以通此書者亦采用之若樛櫨注引齊人諺曰上山斫樛櫨先彈蠨蛸注云俗為喜子之類是也云錯綜樊孫者謂交錯綜聚樊光孫炎二家之注取其理長者用之云博開羣言者闢通也羣言謂子史及小說也言非但援引六經亦博通此子史等以為注說也云剷其瑕礫塞其蕭稂者此喻已作注去

惡取善也剝其瑕礫以玉石喻也剝削去其疵瑕瓦礫以取瑾瑜也擻其蕭稂以禾莠喻也擻拔也蕭蒿也稂童梁莠類也拔去其蕭蒿稂莠以存其嘉禾也云事有隱滯援據徵之者援引也徵成也若事有隱奧滯泥者則援引經據以證成之也云其所易了闕而不論者謂通見詩書不難曉了者則不須援引故闕而不論也云別為音圖用祛未寤者謂注解之外別為音一卷圖贊二卷字形難識者則審音以知之物狀難辯者則披圖以別之用此音圖以祛除未曉寤者故云用祛未寤也云輒復擁篲清道企望塵躅者此郭氏自問也擁手持也篲帚也清道謂清潔道塗也企望者企踵而瞻望也塵躅者塵路躅跡也言已注此書若人持帚以清道企踵而望其芳塵美跡所以然者何謂是自問也云以將來君子為亦有涉乎此也者此亦答也言已注此書非他以為將來有德君子之為必欲研覈百氏探討九流非爾雅不可必涉歷此途若其注釋未備則恐迷誤後

人作注之由
良為此也

爾雅注序

爾雅注疏卷一

原目卷上

晉郭璞注

唐陸德明音義

宋邢昺疏

爾雅郭璞注

疏

璞字景純河東人東晉弘農太守著作郎注著也

解釋經旨使義理著明也亦言己注意以釋此書也詩書謂之傳者傳傳也博識經意傳示後人也此皆其人自題故或言傳或言注無義例也

釋詁第一音義

詁音古又音故樊光李巡本作故說文云詁故言也字林同張揖雜字云

詁者古今疏

釋解也詁古也古今異言解之使人知之異語也釋言則釋詁之別故爾雅序篇云釋

詁釋言通今之字古與今異言也第次也一數之始也以其作最在先故為第一此篇相承以為周公作但其文有周公後事故先儒共疑焉或曰仲尼子夏所增足也或曰當周公時有之今無者或在散亡之中然則詩書所有非周公所釋乃後人依放故言雅記而為之文故與之同郭氏因即援據以成其義若言胡不承權輿及緇衣之席兮此秦康鄭武之時在周公之後明矣其義猶今為文採摭故事以為辭耳則此篇所載悉周公時所有何足怪也其諸篇所次舊無明解或以為有親必須宮室宮室既備事資器用今謂不然何則造物之始莫先兩儀而樂器居天地之先豈天地乃樂器所資乎蓋以先作者居前增益者處後作非一時故題次無定例也其篇之名義逐篇具釋此不繁言此書之作以釋六經之言而字別為義無復章句今而作疏亦不分科段所解經文若其易了及郭氏未詳者則闕而不論其稍難解則

援引經據及諸家之說以證之郭氏之注多采經記
若其通見可曉者則但指篇目而已其或書名僻異
義旨隱奧者則具載
彼文以祛未寤者耳

初哉首基肇祖元胎俶落權輿始也注尚書曰三月哉

生魄詩曰令終有俶又曰俶載南畝又曰訪予落止又

曰胡不承權輿胚胎未成亦物之始也其餘皆義之常

行者耳此所以釋古今之異言通方俗之殊語音義哉

子

來反亦作裁肇音趙胎天才反孫炎大才反本或作台
俶字又作倅尺叔反權巨員反輿音余令力政反胚字
又作𧈧同普才反又匹尤反淮南子及文子並云
婦孕三月而胚說文云胚婦孕一月也胚凝血
疏皆

初

始之異名也初者說文云從衣從刀裁衣之始也哉者
古文作才說文云才草木之初也以聲近借為哉始之
哉首者頭也身之始也基者說文云牆始築也肇者說
文作肇始開也祖者宗廟之始也元者善之長也長即
始義胎者人成形之始也倣者動作之始也落者木葉
隕墜之始也權輿者天地之始也天圓而地方因名云
此皆造字之本意也及乎詩書雅記所載之言則不必
盡取此理但事之初始俱得言焉他皆倣此注云尚書
曰三月哉生魄者康誥文云詩曰令終有倣者大雅既
醉文又曰倣載南畝者周頌載芟文又曰訪予落止者
周頌訪落文又曰胡不承權輿者秦風權輿文云胚胎
未成亦物之始也者說文云胚胎孕一月也胎婦孕三
月也然則尚未成形而為形之始故曰胚胎未成亦物
之始物則形也云其餘皆義之常行者耳者謂初首基
肇祖元也通見詩書故曰義之常行云此所以釋古今
之異言通方俗之殊語者揚雄說方言云皆古今語也

初別國不相往來之言也今或同而舊書雅記故俗語不失其方而後人不知故為之作釋也郭彼注云謂作釋詁釋言是也

林丞天帝皇王后辟公侯君也注詩曰有壬有林又曰

文王丞哉其餘義皆通見詩書音義丞本又作蒸同之

而心反見賢遍反下疏皆天子諸侯南面之君異稱也迄卷終注悉放此白虎通云君羣也羣下之所歸

心也林者說文云平地有叢木曰林丞者左傳云天生烝民樹之以君而司牧之然則人物之衆必立君長以司牧之故以林丞為君也天者說卦云乾為天為君以其俱尊極故也大雅皆謂君為天是也帝皇者白虎通云德合天地者稱帝帝者諦也象可承也皇美也大也天之總美大稱也時質故總稱之號之為皇煌煌人莫

違也王者往也天下所歸往說文云后者繼體君也象人之形施令以告四方故尸之從一口發號者君后也辟者法也為下所法則也公者通也公正無私之意也侯者侯也侯逆順也天帝皇王惟謂天子公侯惟謂諸侯餘皆通稱注云詩曰有壬有林者小雅賓之初筵文又曰文王烝哉者大雅文王有聲文云其餘義皆通見詩書者謂天帝皇王后辟公侯皆義之常行故不備引

弘廓宏溥介純夏撫厖墳嘏丕奕洪誕戎駿假京碩濯訏宇穹壬路淫甫景廢壯冢簡鈞昉旺將業蓆大也注詩曰我受命溥將又曰亂如此撫為下國駿厖湯孫奏假王公伊濯訏謨定命有壬有林厥聲載路既有淫威

廢為殘賊爾土宇販章緇衣之蓆兮廓落宇宙穹隆至極亦為大也劉義未聞尸子曰此皆大有十餘名而同

一實音義

宏戶萌反溥音普介音界夏戶雅反撫火吳反下同庵亡江反又亡項反方言云庵深之

大也墳符云反

反反誕音但駿子浚反又荀閏反假古雅反濯直角反

詩本又作盱

盱同香于反穹起弓反壯側狀反劉郭陟孝

反顧野王都角反

說文云草大也孫都耗反販沈旋蒲

板反此依詩讀也

孫郭方滿反字林方但方旦二反施

乾蒲滿反顧音板

又普姦普練二反睚舊音之日反本

又作至又作脰

顧音充疏此皆廣大之異言也弘者含

尸反蓆音席謨亡乎反

容之大也周書洛誥云武王

弘朕恭廓者方言云張小使大謂之廓宏者書曰若保

宏父介者方言云東齊海岱之間謂之介純者魯頌閟

宮云天錫公純嘏夏者方言云自關而西秦晉之間凡物之壯大而愛偉之謂之夏厖者深之大也墳嘏者方言云墳地大也青幽之間凡土而高且大者謂之墳秦晉之間凡物壯大謂之嘏丕者書云嘉乃丕績奕者詩大雅韓奕云奕奕梁山洪者書大誥云延洪惟我幼沖人誕者大雅生民云誕彌厥月戎者方言云宋魯陳衛之間謂之嘏或曰戎京碩濯許者秦晉之間凡人大謂之樊燕之北鄙齊楚之郊或曰京齊宋之間曰碩荆吳揚甌之郊曰濯中齊西楚之間曰許此皆謂大方俗之殊語也甫者詩齊風云無田甫田景者周頌潛篇云以介景福壯者秦晉之間凡人大謂之樊或謂之壯冢者舍人曰冢封之大也大雅緜篇云乃立冢土簡者周頌執競云降福簡簡箋者郭云義未聞顧氏云都角切說文云草大也韓詩云箋彼圃田將者周頌云日就月將業者版之大也大雅靈臺云虞業維攸餘皆見注注詩云我受命溥將者商頌烈祖文又曰亂如此撫者小雅

巧言文云下國駿厖者商頌長發文云湯孫奏假者商頌那篇文云王公伊濯者大雅文王有聲文云訏謨定命者大雅抑篇文云有壬有林者小雅賓之初筵文云厥聲載路者大雅生民文云既有淫威者周頌有客文云廢為殘賊者小雅四月文云爾土宇畷章者大雅卷阿文云緇衣之席兮者鄭風緇衣文云廓落宇宙穹隆至極亦為大也者廓落大貌四方上下曰宇說文云宙舟輿所極也穹隆天之形也郭氏讀脗為至故云至極是廓宇穹脗亦為大也云尸子曰此皆大有十餘名而同一實者漢書藝文志云尸子二十篇注曰名佼魯人秦相商君師之鞅死佼逃入蜀案尸子廣澤篇云墨子貴兼孔子貴公皇子貴衷田子貴均列子貴虛料子貴別圓其學之相非也數世矣而已皆弁於私也天帝皇后辟公弘廓宏溥介純夏撫冢脗畷皆大也十有餘名而實一也若使兼公虛均衷平易別圓一實也則無相非也以其數字皆訓為大故引之也周公作詁必以始

也君也大也居先者始者無先之稱君者至尊之號大則無所不包故先言之一曰此三者天也人也地也易乾卦云萬物資始坤卦云直方大老子云域中有四大王居其一焉故以此三者為先乾坤相對之物而以地在人後者以人居天地之中且尊尚人君故進之自此而下隨便即言無義例也

輿庵有也注二者又為有也詩曰遂輿大東疏

二者又為有言

大有也成十六年左傳云民生敦龐言人生聚豐厚大有也云詩曰遂輿大東魯頌閟宮文也案今詩本作遂荒此言遂輿者所見本異也或當在齊魯韓詩

迄臻極到赴來弔艘格戾懷摧詹至也注齊楚之會郊曰懷宋曰屈詩曰先祖于摧又曰六日不詹詹摧皆楚

語方言云音義

迄許訖反臻側巾反弔如字又音的艘

更伯反字或作格戾力帝反摧昨

疏迄者自古至今也

雷反又祖雷反詹音占屈音界

疏

大雅生民云以迄

于今臻者詩邶風泉水云遄臻于衛言疾至於衛也極

者窮盡之至也樂記云及夫禮樂之極乎天而蟠乎地

言禮樂之道上至於天下委於地也到者自遠而至也

大雅韓奕云靡國不到赴者趨而至也雜記云凡赴於

君來者自彼至我也春秋經曰祭伯來言至魯也弔者

小雅天保云神之弔矣艘讀為屈屈格戾懷摧詹皆方

俗語注云齊楚之會郊曰懷宋曰屈者方言文云詩曰

先祖于摧者大雅雲漢文又曰六日不詹者小雅采芣

文云詹摧皆楚語方言云者案方言云假徂懷摧詹戾

艘至也郊唐冀兗之間曰假或曰格齊楚之會郊或曰

懷摧詹戾楚語也艘宋語也皆古雅之別語也

今則或同是也○假音駕徂古格字艘古屈字

如適之嫁徂逝往也注方言云自家而出謂之嫁猶女

出為嫁音義

適傷亦反疏皆謂造於彼也如者自我而往也春秋公及大夫朝聘皆曰如之者

論語云之一邦言又往一國也適嫁徂逝皆方俗語注案方言云嫁逝徂適往也自家而出謂之嫁猶女而出為嫁也逝秦晉語也徂齊語也適宋魯語也往凡語也

賚貢錫畀予貺賜也注皆賜與也音義

賚力代反又力臺反貢字或作

贛同畀必寐反下及注同予羊疏皆謂賜與也賚者賜汝反下同貺許誑反本或作況疏有功善人也書湯誓

曰予其大賚汝貢者下與上也左傳齊桓責楚云爾貢包茅不入錫者嘉賜也禹貢云禹錫玄圭畀者付與也

詩鄘風干旄云何以畀之予者授與也小雅采芣云天子所予貺者惠賜也小雅彤弓云中心貺之

儀若祥淑鮮省臧嘉令類緜穀攻穀介徽善也注詩曰

儀刑文王左傳曰禁禦不若詩曰永錫爾類我車既攻

介人維藩大似嗣徽音省緜穀未詳其義餘皆常語音

義淑市六反鮮息淺反又音仙本或作誓沈云古斯字

郭音義云本或作𪔐非古斯字案字書誓先奚反亦

訓善省光郢反臧子郎反令力政反緜勑金反郭勑淫

反穀古豆反一音古侯反徽音暉藩方元反大音泰

疏皆謂美善也儀者形象之善也若者惠順之善也祥

者李巡曰福之善也書泰誓云襲于休祥淑者有德

之善也詩曹風鴈鳩云淑人君子鮮者清潔之善邶風

新臺云籊籊不鮮省緜穀郭氏未詳臧者功能之善也

詩齊風云射則臧兮嘉者美之善也詩大雅抑篇云無

不柔嘉令者大雅卷阿云令問令望類者昭二十八年

左傳云勤施無私曰類攻者堅緻之善穀者養生之善詩小雅小雅云式穀以女介者大善也徽者美善也注云詩曰儀刑文王者大雅文王篇文云左傳曰禁禦不若者左傳無全文案文十八年說四凶云投諸四裔以禦魑魅宣三年傳言鑄鼎象物故民入山林不逢不若蓋采合傳文故言禁禦不若也云詩曰永錫爾類者大雅既醉文云我車既攻者小雅車攻文云介人維藩者大雅板篇文云大如嗣徽音者思齊文云餘皆常語者謂祥淑鮮臧嘉令穀書傳多有之故云皆常語

舒業順敘也注皆謂次序舒業順敘緒也注四者又為

端緒疏敘謂次敘舒者展舒徐緩有次也業者事有次敘也順者不逆有敘也舒業順敘四者又為端

緒互相訓也

怡懌悅欣衍喜愉豫愷康妣般樂也注皆見詩音義

以怡

之反懌音亦衍苦旦反愉羊朱反愷疏皆謂喜樂怡者

苦在反妣丁含反般蒲安反樂音洛

和樂也小雅節

南山云既夷既懌怡夷音義同懌者悅樂也商頌那篇云亦不夷懌悅者心樂也小雅都人士云我心不悅悅說音義同欣者笑喜之樂也大雅鳧鷖云旨酒欣欣毛傳云欣欣然樂也衍者飲食之樂也小雅南有嘉魚云嘉賓式燕以衍喜者說文云不言而悅也小雅彤弓云中心喜之愉者安閒之樂也唐風山有樞云他人是愉毛傳云愉樂也豫者逸樂也小雅白駒云逸豫無期愷者康樂也小雅魚藻云豈樂飲酒康者安樂也唐風蟋蟀云無以大康妣者樂之久也小雅鹿鳴云和樂且湛又衛風氓篇云無與士耽鄭箋云耽非禮之樂般者遊樂也周頌篇名也鄭箋云般樂也○按郭以爾雅之作多為釋詩且詩中備有此文故云皆見詩其實六經之

中所訓亦爾但以詩書之作非一人故有音義雖同而字形踳駁者詩文作湛耽而此作妣詩文作夷說豈弁槃而此作怡悅愷般之類直以異人之作故不同爾無義例也他皆放此

悅懌愉釋賓協服也注皆謂喜而服從音義

協胡疏謂

喜而服從也悅懌愉者皆喜樂而服也釋者釋去恨怨而服也賓者懷德而服也旅葵云四夷咸賓協者和合而服也左傳曰謀其不協

適遵率循由從自也注自猶從也適遵率循也注三者

又為循行音義

通孫云古述字讀聿一音餘橘反率所律反循音旬行下孟反

疏

自亦從也

轉互相訓也適者大雅縣篇云聿來胥宇通聿音義同遵者周南汝墳云遵彼汝墳率者大雅縣篇云率西水

許循者顧命云率循大卞由者曲禮大夫士出入君門
由闕右從者小雅何人斯云伊誰云從適遵率三者又
為循行

靖惟漠圖詢度咨諏究如慮謨猷肇基訪謀也注國語

曰詢于八虞咨于二號度于閔天謀于南宮諏于蔡原

訪于辛尹通謂謀議耳如肇所未詳餘皆見詩音義靖

音

靜漠孫音莫舍人云心之謀也度徒洛反注同諏子頭
反猷音猶肇音趙究九又反謨亡胡反基本或作謨音
同謀莫浮反號古伯反閔疏皆謂謀議也靖者安謀也
音宏天於兆反原音元小雅小旻云靖共爾位惟
者思謀也漠者舍人曰心之謀也小雅小弁云聖人莫
之漠莫音義同圖者大雅崧高云我圖爾居詢度咨諏

者小雅皇皇者華傳云訪問於善為咨咨事為諏咨事之難易為謀咨禮之所宜為度親感之謀為詢究者小雅小弁云不舒究之慮者計謀也謨者大謀也大雅云許謨定命猷者以道而謀也大雅文王云厥猶翼翼猷猶音義同肇者大雅江漢云肇敏戎公基者君子作事謀始也訪者謀政事也注云國語曰詢于八虞咨于二虢度于閔天謀于南宮諏于蔡原訪于辛尹者皆晉語胥臣對文公辭說文王之即位也韋氏解云八虞周八士皆在虞官二虢文王弟虢仲虢叔南宮南宮括也蔡蔡公原原公辛辛甲尹尹逸皆周太史

典彝法則刑範矩庸恒律戛職秩常也注庸戛職秩義

見詩書餘皆謂常法耳音義

彝以而反範音犯字或作范同戛居黠反郭苦八反

秩長栗反疏皆謂常禮法也典刑者詩大雅蕩篇云尚秩長栗反疏有典刑彝者洪範云彝倫攸敘法則者天

官冢宰以八法治官府以八則治都鄙鄭注云邦國官府謂之禮法常所守以為法式也則亦法也典法則所用異異其名也範者模法之常也矩者度方有常也庸者書臯陶謨云自我五禮有庸哉恒久之常也湯誥云若有恒性律者常法也夏者康誥云不率大夏職者主之常也秩者商頌烈祖云有秩斯祜

柯憲刑範辟律矩則法也注詩曰伐柯伐柯其則不遠

論語曰不踰矩音義

柯古河反辟婢亦反下疏此亦謂同踰以朱反矩俱字反常法轉

互相訓柯者執以取法也憲者大雅桑扈云百辟為憲辟罪法也刑範律矩則皆謂常法也注云詩曰伐柯伐柯其則不遠者豳風伐柯文云論語曰不踰矩者為政文

辜辟戾臯也注皆刑罪音義

辜古胡反臯古罪字秦始皇以其字似皇字改從四

非疏皆謂刑罪也辜者書仲虺之誥云罔不懼于非辜辟者呂刑云墨辟疑赦戾者大雅抑篇云亦維斯戾辜罪古今字也訓文云辜犯法也從辛從自言辜人盛鼻苦辛之憂秦以辜似皇改為罪取非人自投於罔古文自為辜

黃髮齟齬鮐背耆老壽也注黃髮髮落更生黃者齟齬

齒墮更生細者鮐背背皮如鮐魚耆猶耆也皆壽考之

通稱音義

兒本今皆作齟五兮反一音如字鮐天才反一音夷背博內反耆音苟更古孟反細先計

反耆巨伊反

疏皆壽考之通稱也黃髮者舍人曰黃髮稱尺證反老人髮白復黃也郭云黃髮髮落更生

黃者齟齬者說文云齟老人兒齒也郭云齒墮更生細者魯頌閟宮云既多受祉黃髮兒齒鄭箋云兒齒亦壽

徵鮐背者舍人曰老人氣衰皮膚消瘠背若鮐魚郭云鮐背背皮如鮐魚劉熙釋名云九十曰鮐背背有鮐文大雅行葦云黃耆鮐背毛傳云鮐背大老也鄭箋云台之言鮐也大老則背有鮐文方言云秦晉之郊陳亮之會謂老曰耆鮐耆者郭云耆也方言云燕岱北鄙謂耆為黎郭彼注云黎面色似凍黎也舍人曰耆觀也血氣精華觀竭言色赤黑如狗矣孫炎曰耆面如凍黎色如浮垢老人壽徵也老者說文云七十曰老從人毛匕言鬚髮變白也

允孚曾展謚誠亮詢信也注方言曰荆吳淮泗之間曰

展燕岱東齊曰謚宋衛曰詢亦皆見詩音義允音尹孚

音敷亶丁

但反謚甚針疏皆謂誠實不欺也○案方言云允訖詢反岱音待展諒穆信也齊魯之間曰允燕岱東齊

曰訖宋衛汝穎之間曰恂荆吳淮泗之間曰展西甌毒屋黃石野之間曰穆衆信曰諒周南召南衛之語也云亦皆見詩者鄘風定之方中云終然允臧大雅文王云萬邦作孚小雅祈父云亶不聰鄘風君子偕老云展如之人兮大雅蕩篇云其命匪謏誠者復言之信也鄘柏舟云不諒人只鄭風溱洧云洵訐且樂訖謏亮諒詢洵音義同

展謏允慎亶誠也注轉相訓也詩曰慎爾優游疏

皆謂至誠

轉相訓也詩曰小雅白駒文

謏浪笑教戲謏也注謂調戲也見詩音義

謏許虐反笑蘇誚反教五

報反戲虛寄疏反調徒弔反

疏詩曰謏浪笑教者不敬之戲謏也舍人曰謏戲謏也浪意朗也笑心樂也教意

舒也戲笑邪戲譁笑之貌郭云
謂調戲也見詩者邶風終風文

粵于爰曰也注書曰土爰稼穡詩曰對越在天王于出

征爰粵于也注轉相訓音義

征之成反粵音越爰音
表稼古乍反穡音色

疏

皆謂語辭發端轉互相訓也說文云曰從開口象氣出
於口也注云書曰土爰稼穡者周書洪範文云詩曰對
越在天者周頌清廟文云
王于出征者小雅六月文

爰粵于那都繇於也注左傳曰棄甲則那那猶今人云

那那也書曰臯陶曰都繇辭於乎皆語之韻絕音義乃那

河反繇除又反注同孫音由疏皆語之韻絕歎辭也爰
又音遙於音烏注同陶音遙粵于三者又為於乎注

云左傳曰棄甲則那者宣二年華元答謳者辭也云書曰臯陶曰都者虞書臯陶謨文也云繇辭者繇卦兆之辭也云於乎者周頌維天之命云於乎不顯是也

故郇盍翕仇偶妃匹會合也注皆謂對合也音義

故反

郇音合又音洽盍胡獵反翕許急反仇疏皆謂對合也音求偶五口反妃音配又芳非反下同故者說文云

合會也郇者和合也盍者衆合也易豫卦九四云勿疑朋盍簪翕者斂合也書臯陶謨云翕受敷施仇者左傳曰怨耦曰仇偶者相對合也左傳曰大都耦國妃者嘉耦曰妃匹者配合也大雅文王有聲云作豐伊匹會者集合也周禮曰時見曰會

仇讐敵妃知儀匹也注詩云君子好仇樂子之無知實

維我儀國語亦云丹朱馮身以儀之讐猶儔也廣雅云

讐輩也音義

讐市周反樂音洛馮皮冰反

疏

皆謂匹合也仇者孫炎云相求之匹讐者儔侶

輩類之匹也敵者相當之匹也妃合耦之匹也注云詩云君子好仇者周南關雎文云樂子之無知者檜風隰有萋楚文云實維我儀者鄺柏舟文也云國語亦云丹朱馮身以儀之者案周語惠王十五年有神降于莘王問於內史過曰今是何神也對曰昔昭王娶於房曰房后實有爽德協于丹朱丹朱馮身以儀之生穆王焉實臨照周之子孫而禍福之夫神一不遠徙遷若由是觀之其丹朱乎韋氏解云馮依也儀匹也言房后之行有似丹朱丹朱馮依其身而匹偶之生穆王焉

妃合會對也注皆相當對妃嬪也注相偶嬪也音義

嬪普

計反郭音譬疏此三者又為當對妃
字林匹地反又為嬖謂相偶嬖也

紹胤嗣續纂綏績武係繼也注詩曰下武維周綏見釋

水餘皆常語音義

紹市小反胤羊忍反又以刃反纂子
管反綏汝誰反績子狄反係戶帝反

繼音

疏

皆聯繼不絕也紹者大雅抑篇云弗念厥紹胤
者大雅既醉云永錫祚胤嗣者周頌酌篇云載

計

用有

嗣續者小雅斯干云似續妣祖纂者魯頌閟宮云

績禹之緒綏武見注績者陳東門之粉云不績其麻係

者繫屬之繼易曰係小子失丈夫注云詩曰下武維周

者大雅下武文云綏見釋水者彼云汎汎揚舟緇緇維

之緇緇也綏

也是矣

急謚謚蟄慎貉謚顙顙密寧靜也注急顙顙未聞其義

餘皆見詩傳音義

急本或作氣同許氣反謚詩至反謚以日反蟄直立反貉莫白反又武博

反謚彌畢反顓魚豈反又五愷反疏皆安靜也謚者人

顧魚毀反沈五罪反孫郭五鬼反死將葬誄列其行

而作之也溢者盈溢者宜靜周頌維天之命云假以溢

我蟄者藏伏靜處也易曰龍蛇之蟄慎者謹靜也大雅

云淑慎爾止貉者靜定也大雅皇矣云貉其德音鄭箋

云德政應和曰貉謚者說文云靜語也密者周頌昊天

有成命云夙夜基命宥密寧

者周頌良邦云婦子寧止

隕殞湮下降墜標落也注殞猶隕也方俗語有輕重

耳湮沈落也標落見詩音義

隕于閔反殞于敏反石落也湮郭音因又音烟又音

翳降古巷反墜本又作隊同直類反標婢眇反又普交

符表二反藹力丁反字或作苓說文云草曰苓木曰落

爾雅主疏

沈直疏皆謂墮落也。隕者說文云從高墜也。易曰有隕今反疏自天殞者石落也。郭云殞猶隕也。方俗語有輕重耳。湮沈落也。下者自上而落也。降即下也。曲禮謂羽鳥死曰降。墜者說文曰從高墜也。左傳曰弗敢失墜。標者召南云標有梅。藟者說文云草曰藟。木曰落。此對文爾。散而言之他物之落亦言藟。酈風定之方中云靈雨既零。藟零。音義同。

命令禧畛祈請謁訊誥告也。注禧未聞禮記曰畛於鬼

神音義

畛之忍反。訊音信。誥羔報反。又古酷反。告古篤反。

疏皆謂告諭也。命者使告也。詩唐風揚

之水云我聞有命令者發號以告也。論語云其身正不令而行。畛者致告也。祈者求告也。書召誥云祈天永命。請者言告也。婚禮五曰請期。謁者告白也。月令曰謁之天子。訊者告問也。詩云歌以訊之。誥者布告也。書大誥

洛誥之類是也
於鬼神下曲禮文

永悠迥違遐過闊遠也注書曰過矣西土之人永悠迥

遠遐也注遐亦遠也轉相訓音義

悠音由迥戶頂反過說文云古遯字他歷

反郭湯革反闊苦活反

疏

皆謂遼遠也永者長遠也周南漢廣云江之永矣悠者小雅漸漸之石云山川

悠遠迥者大雅云泂酌彼行潦迥泂音義同違者離遠也召南殷其雷云何斯違斯遐者大雅旱麓云遐不作人過者古文遯也闊者相疏遠也邶風擊鼓云于嗟闊兮永悠迥遠四者又為遐也遐亦遠也轉相訓爾過矣西土之人周書牧誓文也

虧壞圯垝毀也注書曰方命圯族詩曰乘彼垝垣虧通

語耳音義

虧字又作虧祛危反郭又許宜反壞音怪說文云敗也籀文作敕字林云壞自敗也下怪

反敕毀也

公壞反圯孫房美

疏皆謂毀敗也虧者損毀

反岸毀也

圯古委反垣音袁

祭義云不虧其體壞者

人毀也

音怪一云自毀也乎怪切圯者岸毀也書序曰

祖乙圯于耿

圯是毀垣也注云書曰方命圯族者堯典

文孔安國云

圯毀族類也言鯀性狼戾好比方名命而

行事輒毀敗

善類云詩曰乘彼圯垣者衛風氓篇文也

矢雉引延順薦劉繹尸旅陳也注禮記曰尸陳也雉順

劉皆未詳音義

繹音亦

疏

皆謂敷陳也矢者書序云臯陶矢厥謨引者伸陳也延鋪

陳也薦者饌陳也繹者復陳也周頌賡篇云時周之命

於繹思尸者主陳也旅者謂布陳也大雅賓之初筵云

殺核維旅注云禮

記曰者郊特牲文

尸職主也注左傳曰殺老牛莫之敢尸詩曰誰其尸之

又曰職為亂階疏皆謂為之主宰也注云左傳曰殺老

牛莫之敢尸者成十七年傳云晉欒

書中行偃遂執公焉召韓厥韓厥辭曰昔吾畜於趙氏

孟姬之讒吾能違兵古人有言曰殺老牛莫之敢尸而

况君乎二三子不能事君焉用厥也是其事云詩曰誰

其尸之者召南采蘋文又曰職為亂階者小雅巧言文

尸案也注謂案地案察官也注官地為案同官為察音

義案李孫郭並七代反下及注同樊疏案謂案地主事

北在反察字又作僚同力彫反

疏者必有案地案

采也采取賦稅以供己有案地及言同察者皆謂居官

者也注云官地為案者禮運云大夫有采以處其子孫

是也云同官為察者左傳文

七年荀林父告先蔑之辭也

績緒采業服宜貫公事也注論語曰仍舊貫餘皆見詩

書音義

采七在反服本或作艘同符福反又作般字貫古玩反

疏

皆事為也績者功事也商頌云

設都于禹之績緒者事業也魯頌閟宮云績大王之緒采者阜陶謨云亮采有邦業者學人所有事書周官云業廣惟勤服者周南關雎云寤寐思服宜者宜其事也大雅鳧鷖云公尸來燕來宜貫者魏風碩鼠云三歲貫女公者周頌酌篇云實維爾公允師注云論語者先進仍舊貫如之何何必改作是也

永義引延融駿長也注宋衛荆吳之間曰融義所未詳

音義

義羊讓反字從永說文云水長也引以忍反駿本或作俊又作峻同子閏反長直良反

疏說

云長久遠也方言云施於衆長謂之永引者漢書律歷志云十丈為引引者信也顏師古曰信讀曰伸言其長

延者方言云延季長也凡施於季者謂之延又曰宋衛荆吳之間曰駟駿者長大也

喬嵩崇高也注皆高大貌左傳曰師叔楚之崇也崇充

也注亦為充盛音義

喬郭音橋或音驕嵩宿忠反

疏

皆高大貌喬周頌般篇云墮山

喬嶽釋山云山大而高崧嵩崧音義同崇者高貴也亦為充盛樂記云復綴以崇云楚之崇也者宣十二年傳

文杜注云師叔潘

阼為楚人所崇貴

犯奢果毅尅捷功肩堪勝也注陵犯誇奢果毅皆得勝

也左傳曰殺敵為果肩即尅耳書曰西伯堪黎音義

捷才

接反肩音堅堪字又作戡同苦舍反勝尸疏皆謂得勝

證反注及下同誇口花反黎郎兮反國名

疏也舍人曰

肩強之勝也孫炎曰戡勝之勝也陵犯誇奢殺敵為果
致果為殺尅殺捷獲有功肩尅堪任是皆得勝也注云
左傳曰殺敵為果者宣二年君子辭
也云書曰西伯堪黎者商書篇名也

勝肩戡劉殺克也注轉相訓耳公羊傳曰克之者何殺

之也音義

殺所黜反舊所例反說文云戮也

疏

克亦勝也詩周頌敬之云佛時仔肩毛傳云仔

肩克也又為殺也皆謂得勝而殺之轉互相訓注云公羊傳者隱元年經曰夏五月鄭伯克段于鄆傳曰克之者何殺之也

劉獮斬刺殺也注書曰咸劉厥敵秋獵曰獮應殺氣也

公羊傳曰刺之者何殺之也音義

獮息淺反說文或作壘刺七賜反說文云

君殺大夫曰刺刺直傷也周禮司刺掌三刺之法以聽獄訟或七亦反應應對之應疏說文云殺文二年左傳曰狼睥取戈以斬囚餘皆具注注云書曰咸劉厥敵者周書君奭文云秋獵為獮釋天文云應殺氣也者言秋氣肅殺故名秋獵為獮大司馬云中秋教治兵遂以獮田是也云公羊傳曰刺之者何殺之也者僖二十七年傳文也經云公子買戍衛不卒戍刺之故傳云此也

𡗗𡗗𡗗沒孟敦勗劔茂勗勉也注詩曰𡗗𡗗文王靈

沒猶黽勉書曰茂哉茂哉方言云周鄭之間相勸勉為

勗劔孟未聞音義

𡗗𡗗字或作𡗗同亡匪反靈彌畢反又亡忍反本或作𡗗說文曰𡗗古密

字敦丁門反勗許玉反劔古堯反又之遙反茂字又作懋亦作悉同亡候反勗上照反或上遙反勗字本作𡗗

又作黽或音泯又彌充反僂字又作疏皆謂勸勉也敦
黽亡忍反又亡衍反茂哉或作茂才疏者厚相勉也勗
者邶風燕燕云以勗寡人劬者勉力也餘皆見注注云
詩曰疊疊文王者大雅文王文也言勉勉乎不倦文王
之勤用明德也云蟲沒猶黽勉者以其聲相近方俗語
有輕重耳邶風谷風云黽勉同心云書曰茂哉茂哉者
臯陶謨文也書作懋茂懋古今字也云方言云以下者
案彼云釗薄勉也秦晉曰釗或曰薄故其鄙語曰薄努
猶勉努也南楚之外曰薄努自關而東
周鄭之間曰勗釗齊魯曰勗茲是也

驚務昏啓強也注馳驚事務皆自勉強書曰不昏作勞

啓不畏死音義

驚音務啓音閔或作疏皆謂自勉強也
是強也其文反注同驚謂馳驚務謂

事務二者皆以力勉強孫炎曰昏夙夜之強也注云
書曰不昏作勞者盤庚文云啓不畏死者康誥文

印吾台予朕身甫余言我也注印猶缺也語之轉耳書

曰非台小子古者貴賤皆自稱朕禮記曰授政任功曰

予一人畛於鬼神曰有某甫言見詩音義印五剛反台孫羊而反下

同予余並羊如反缺烏郎烏黨烏浪三反說文疏我者云女人稱我曰缺任而煇反畛之忍反某音畝疏施身

自謂也此皆我之別稱也印者郭云印猶缺也語之轉耳說文云女人稱我曰缺由其語轉故曰印邶風範有

苦葉云人涉印否吾者孔子曰吾自衛反魯身者我之躬也余者邶谷風云伊余來暨餘皆見注注云書曰非

台小子者湯誓文云古者貴賤皆自稱朕者大禹謨云帝曰朕宅帝位禹曰朕德罔克屈原亦云朕皇考曰伯

庸是貴賤皆自稱朕史秦始皇二十六年定為至尊之稱漢因不改以迄於今云禮記云授政任功曰予一人

金匱要略卷一
吟於鬼神曰有某甫者皆下曲禮文云言見
詩者周南葛覃云言告師氏言告言歸是也

朕余躬身也注今人亦自呼為身音義

躬音疏身即我

今人亦自呼為身舍人曰余謙卑之身也孫炎曰余舒
遲之身也僖九年左傳云齊侯曰小白余杜注云小白
齊侯名余身也邶
谷風云我躬不閱

台朕賚畀卜陽予也注賚卜畀皆賜與也與猶予也因

通其名耳魯詩云陽如之何今巴濮之人自呼阿陽音

義

畀必二反陽音暘又如字本或作

疏予即與也皆謂

也讀與賚同朕者我與之也賚畀卜皆賜與也說命云
夢帝賚予良弼鄘風干旄云何以畀之小雅天保云君

曰卜爾萬壽無疆注云與猶予也因通其名耳者說文云與黨與也予推予前人也象兩手相與之形今經典多以與為推予故云因通其名耳云魯詩云陽如之何者漢書藝文志云魯申公為詩訓故是為魯詩其經云陽如之何申公以陽為予故引之云今巴濮之人自呼阿陽者以時驗而言也

肅延誘薦餞晉寅蓋進也注禮記曰主人肅客詩曰亂

是用餞王之蓋臣易曰晉進也寅未詳音義誘余九反

反徐仙民詩音閭餘占反郭持鹽反疏皆謂進道延者

晉本又作晉蓋本又作燼同徐刃反疏引而進之射義

云子路出延射誘者道而進之也召南野有死麕云吉

士誘之薦者進獻也月令云先薦寢廟餘皆見注注云

禮記曰主人肅客者上曲禮文也鄭注云進客謂道之

云詩曰亂是用餞者小雅巧言文云王之蓋臣者大雅

文王文云易曰晉進也者晉卦彖辭也

羞餞迪烝進也注皆見詩禮音義

餞徂淺反迪大疏謂的反烝之仍反

與也羞者曲禮云聞子有客使其羞餞者進飲食之名也迪者以道而進也烝者周頌豐年云烝畀祖妣

詔亮左右相導也注皆謂教導之詔相導左右助勵也

注勵謂贊勉亮介尚右也注紹介勸尚皆相佑助左右

亮也注反覆相訓以盡其義音義

左右音佐佑下同相息亮反下文同導徒

報反注及下同勵力庶反介音界覆芳服反

疏詔者大宗伯云詔相王之大禮亮者大雅大明云涼彼武

王左右者周南關雎云左右流之相者鄉飲酒云相者一人此皆謂教道之也教道即贊勉也故又為勵說文

云勸助也不以力助以心助也郭云紹介勸尚皆相佑助孫炎曰介者相助之義如人之左右手故以介為左右也大雅生民云攸介攸止故轉為右左右即亮也亦皆謂佐助反覆相訓以盡其義亮涼音義同

緝熙烈顯昭皓頰光也注詩曰學有緝熙于光明又曰

休有烈光音義

緝七入反熙許其反疏顯者光明也大

令德說文云昭日明也大雅雲漢云昭回于天皓者亦日光也頰火光也小雅無將大車云不出于頰注云學有緝熙于光明者周頌敬之文云休有烈光者周頌載見文

劼鞏堅篤擊虔膠固也注劼虔皆見詩書易曰鞏用黃

牛之革固志也擊然亦牢固之意音義

劼苦黠反郭苦八反或作砮字

古黠反鞏九勇反篤丁毒反擊音牽又却
 閑反郭音義本與慳悒同虔音乾膠音交
 也鞏者說文云以革有所束也堅者剛強之固也論語
 曰不曰堅乎磨而不磷篤者厚也物厚者牢固擊者擊
 亦牢固之意虔者恭之固膠者所以固物小雅隰桑云
 德音孔膠注云劼虔皆見詩書者酒誥云劼毖殷獻臣
 大雅韓奕云虔共爾位云易曰鞏用黃牛之革固志也
 者案革卦云初九鞏用黃牛之革遯卦六二象曰執用
 黃牛固志也文與此異然則郭云固志
 者所以釋革卦之鞏非謂遯之固志

疇孰誰也注易曰疇離祉音義

疇本又作齏直留反祉音恥

疏

皆謂語辭

不為義也又猶言誰人也論語云君孰與不足陳
 風墓門云誰昔然矣疇離祉易否卦九四爻辭也

咼咼皇皇藐藐穆穆休嘉珍褱懿鏘美也注穆穆已上

皆美盛之貌其餘常語音義

睢于况反又于柄反貌亡角反禕於宜反懿音意鑠

舒灼反上時掌

疏皆謂美盛也少儀云祭祀之美濟濟

反盛或作臧同

皇皇鄭玄云皇皇讀如歸往之往彼

言皇皇則此睢睢也少儀又云言語之美穆穆皇皇曲

禮云天子穆穆諸侯皇皇鄭注皆云行容止之貌然則

皇皇穆穆者皆語言容止之美盛也大雅崧高云既成

藐藐毛傳云藐藐美貌休者大禹謨云戒之用休又曰

嘉乃丕績儒行云席上之珍以待聘禕者歎美也懿者

周頌時邁云我求懿德鑠者周頌酌篇於鑠王師是皆

謂美之

常語爾

諧輯協和也注書曰八音克諧左傳曰百姓輯睦關關

雍雍音聲和也注皆鳥鳴相和懿變和也注書曰變友

柔克音義

諧下階反輯音集又七入反雍於恭疏皆謂反總本又作協同戶牒反變蘇頌反和同

協者說文云衆之同和也關關雉鳴者皆鳥鳴音聲相和也周南關雎云關關雎鳩邛風匏有苦葉云雍雍鳴雁總即古文協字注云書曰八音克諧者虞書舜典文云左傳曰百姓輯睦者案僖十五年及成十六年皆云羣臣輯睦其是乎云書曰變友柔克者周書洪範文

從申神加弼崇重也注隨從弼輔增崇皆所以為重疊

神所未詳音義

弼白筆反重直龍反注同疊音牒

疏

隨從申重加增弼輔崇充皆所以為

重疊也大雅鳧鷖云福祿來崇

穀悉卒泯忽滅罄空畢罄殲拔殄盡也注穀今直語耳

忽然盡貌今江東呼厭極為罄餘皆見詩音義

穀胡角反又胡

谷反卒予恤反字或作碎泯亡忍反罄苦定反罄苦計

反說文口地反云器中盡也本或作慙字音同廣雅云

慙劇也殲子庶反拔步八疏此皆謂終盡敵今直語耳

反殲大典反厭一豔反忽然盡貌左傳曰臯陶庭

堅不祀忽諸注云今江東呼厭極為罄者以時驗而言

也說文云器中盡也云餘皆見詩者悉者說文云詳盡

也卒者終盡也衛風日月云畜我不卒泯者滅盡也大

雅桑柔云靡國不泯滅絕盡也小雅正月云寧或滅之

罄者說文云器中空也小雅蓼莪云餅之罄矣空者小

雅大東云杼柚其空畢者小雅無羊云畢來既升殲者

舍人曰衆之盡也秦風黃鳥云殲我良人

拔者寧除使盡也殲者詩云邦國殲瘁

苞蕪茂豐也注苞叢繁蕪皆豐盛音義

苞百交反蕪音無或亡甫反蕃

滋生長也古本疏皆豐盛也苞者草木叢生也禹貢云作隸豐敷馮反疏草木漸苞蕪者繁蕪也洪範云庶草蕃廡蕪廡音義同茂者茂盛也小雅天保云如松柏之茂

摯斂屈收戢蒐裒鳩樓聚也注禮記曰秋之言摯摯斂也春獵為蒐蒐者以其聚人衆也詩曰屈此羣醜原隰

裒矣左傳曰以鳩其民樓猶今言拘樓聚也音義摯孫

子由

反郭音道案道音子由徂秋二反斂力儉反屈邱勿反戢側立反蒐所求反裒古字作裒蒲侯反下同字本或作桴鳩居牛反說文作勾音九尤反樓力疏皆會聚也侯反從手本或作樓非隰音習拘古侯反疏斂者率聚也禮記大學曰百乘之家不畜聚斂之臣收者周頌維天之命云我其收之戢者藏聚也周頌時邁云載戢干

戈餘皆見注注云禮記曰秋之言摯摯斂也者鄉飲酒
義文云春獵為蒐蒐者以其聚人衆也者春獵為蒐釋
天文云詩曰屈此羣醜者魯頌泮水文云原隰裒矣者
小雅常棣文云左傳曰以鳩其民者隱八年文云樓猶
今言拘樓聚也者
以時驗而言也

肅齊遄速亟屢數迅疾也注詩曰仲山甫徂齊音義

市遄

專反亟欺冀反又居力反屢力具反疏皆謂急疾也肅
數色角反迅信峻二音徂才孤反者召南小星云
肅肅宵征毛傳云肅肅疾貌齊者壯疾也遄者邶風泉
水云遄臻于衛速者論語云無欲速亟者欺冀切論語
曰好從事而亟失時一云亟居力切大雅靈臺云匪亟
其欲屢者小雅巧言云君子屢盟數者祭義云祭不欲
數迅者疾走也論語云迅雷風烈必
變注云仲山甫徂齊者大雅丞民文

寔駿肅亟遄速也注詩曰不寔故也駿猶迅速亦疾也

音義

寔本或作夷同子感反亟又作急同居力反經典亦作棘同

疏

速亦疾也肅亟遄轉相訓耳駿

者猶迅也禮記大傳云逡奔走駿逡音義同鄭注云疾奔走言勸事也不寔故也鄭風遵大路文

壑阮阮滕徵隍漣虛也注壑谿壑也阮阮謂阮壑也隍

城池無水者方言云漣之言空也皆謂丘墟耳滕徵未

詳音義

臺本或作叡同許各反郭胡郭反阮苦衡反滕徒登反隍音皇城池也漣字又作獻同苦郎反

說文云水之空也方言作廉亦空也郭云本或作荒荒亦邱墟之空無虛許居反谿音溪壑七豔反墟去魚反疏皆謂空虚也壑者谿壑也大雅韓奕云實墉實壑阮阮者坎陷之虛也但重言耳隍者城池無水者易曰

城復于隍。濂者注引方言云：康之言空也。彼注云：濂，窳空貌，亦丘墟之空也。小雅賓之初筵云：酌彼康爵。鄭箋云：康，空也。濂，康音義同。

黎庶烝多醜。師旅衆也。注皆見詩音義。

烝，反之。疏，皆謂衆仍反。疏，影也。注

云皆見詩者，大雅雲漢云：周餘黎民，靈臺云：庶民子來。烝民云：天生烝民。周頌載見云：思皇多祐。大雅絲篇云：戎醜攸行。棫樸云：六師及之。小雅采芑云：振旅闐闐之類是也。

洋觀哀衆那多也。注詩曰：薄言觀者。又曰：受福不那。洋

溢亦多貌。音義

洋音羊。洋溢多貌。讀羊者，或為詳，非也。觀，顧謝音官。施古喚反。注同。那，奴多反。

本或疏

皆謂重多也。洋者，洋溢亦多貌。魯頌閟宮云：萬舞洋洋。哀者，聚之多也。易曰：君子以裒多益寡。

衆者周頌臣工云命我衆人注云詩曰薄言
觀者小雅采綠文又曰受福不那者桑扈文

流差東擇也注皆選擇見詩音義

差楚佳反
東音簡

疏

皆選擇
也周南

關雎云左右流之小雅吉日云既差我馬
邶風云簡兮簡兮皆是也簡東音義同

戰慄震驚難竦恐惛懼也注詩曰不難不竦惛即懾也

音義

慄六日反難女版反竦息
勇反恐邱勇反惛之涉反

疏

皆惶怖也論語曰使
民戰慄詩秦風黃鳥

云惴惴其慄易曰震雷虩虩又曰驚遠而懼邇也詩云
不難不竦月令曰國時有恐樂記曰柔氣不懾是皆懼
也惛即懾也注云不難
不竦者商頌長發文

痛瘡虺積玄黃劬勞咎頽瘡痾鰥戮癰癰瘰癧瘰癧瘰癧

逐疔瘰癧癰瘰癧病也注疔積玄黃皆人病之通

名而說者便謂之馬病失其義也詩曰生我劬勞書曰

智藏瘰在相戮辱亦可恥病也今江東呼病曰瘰東齊

曰瘰禮記曰親瘠色容不盛逐未詳餘皆見詩音義

痛普

胡芳膚二反詩作鋪瘠音徒詩作屠疔虎回反又呼懷
反積徒回反劬土于反咎音回頤字或作悴在醉反瘰

音勤字亦作勲瘰羊朱反又羊主反鰥古頑反注瘰同
瘰傷汝反舍人云瘰癧瘰瘰皆心憂憊之病也孫炎云

瘰者畏之病也字林音恕詩作鼠癰郭作拘攣同力專
反瘰音里瘰音羊底祈支反或丁禮反本作疲字書云

疲病也聲類猶以為底字又音支孫炎云滯之病也瘰
音慈瘰音救瘰音昧一音晦瘰徂何反又子衰反瘰符

非反又符沸反說文蒲愷反風病也瘡丁但反又徒丹反孫炎云疫病瘵側界反字林側例反瘵音莫瘵徂細反或徂疏疾甚曰病此皆病之通名耳孫炎曰病人疲犁反不能行之病瘡馬疲不能進之病也瘵積馬罷不能升高之病玄黃馬更黃色之病然則也積者病之狀玄黃者病之變色郭云皆人病之通名而說者便謂之馬病失其義也蓋指孫炎不能弘通故云失其義也咎者罪病也頸者小雅雨無正云維躬是瘁頸瘁音義同瘵者勞苦之病也瘵者小雅角弓云交相為瘵戮者相戮辱亦可恥病也瘵及瘁者小雅正月云瘵憂以瘁舍人云瘵瘵瘵瘵皆心憂憊之病也孫炎云瘵者畏之病也瘵者小雅正月云悠悠我里瘵里音義同底者孫炎云滯之病也小雅白華云俾我底兮底者瑕釁小病也閔者幽風鴟鴞云鬻子之閔斯逐者衛風考槃云碩人之軸鄭箋云軸病也軸與逐蓋今古字郭氏未詳疾者小雅采芣云憂心孔疚疾者小雅十月云亦孔之瘵

瘥者節南山云天方薦瘥瘥者四月云百卉具腓腓音義同瘡者大雅板篇云下民卒瘡瘡者大雅瞻仰云士民其瘡瘡者大雅桑柔云瘡此下民餘皆見注注云生我劬勞者小雅蓼莪文云書曰智藏瘡在者周書召誥文云今江東呼病曰瘡者以時驗而言云東齊曰瘡者方言文云禮記曰親癘色容不盛者玉藻文

恙寫惺盱繇慘恤罹憂也注今人云無恙謂無憂也寫

有憂者思散寫也詩曰悠悠我惺云何盱矣繇役亦為

憂愁也音義

恙羊讓反寫悉冶反惺音里盱本或作忤同香于反繇音遙慘七感反罹力知反

疏皆謂憂愁也恙者聘禮云公問君賓對公再拜鄭注云拜其無恙郭云今人云無恙謂無憂也寫者有憂者思散寫也小雅車牽云我心寫兮繇者繇役亦為憂愁慘者心憂也恤者小雅祈父云胡轉予于恤罹者王

風兔爰云逢此百雁注云詩曰悠悠我惺者小雅十月文云云何盱矣者卷耳及都人士文也

倫勤卽敕勤愉庸痺勞也注詩曰莫知我勸維王之卽

哀我痺人國語曰無功庸者倫理事務以相約敕亦為

勞勞苦者多情愉今字或作窳同音義

勸字或作勃與世反郭音謚字

亦作肆卽巨凶反敕本又作飭竝恥力反案說文字林來旁作力是勞來之字東旁作文是始音丑力反愉羊主反又羊朱反痺丁賀反本或作憚音同窳羊主反疏字林云汙也音烏說文云汙窳也案汙窳猶汙邪也皆謂勞苦也倫者理也理治事務者必勞勸者廣雅云苦也孫炎曰習事之勞也敕者相約敕也亦為勞苦勤者勞力也梓材云既勤垣墉愉者懶也郭云勞苦者多情愉今字或作窳同庸者民功曰庸痺者說文云勞病

也注云詩曰莫知我勩者小雅雨無正文云維王之印者巧言文云哀我瘵人者大東文云國語曰無功庸者案晉語韓獻子老使公族穆子受事於朝辭曰厲公之亂無忌備公族不能死臣聞之曰無功庸者不敢居高位今無忌智不能匡君使至於難仁不能救勇不能死敢辱君朝以忝韓宗請退也固辭不立悼公聞之曰難雖不能死而能讓不可不賞使掌公族大夫是其事也

勞來強事謂翦簪勤也注詩曰職勞不來自勉強者亦勤力者由事事故為勤也詩曰迨其謂之翦簪朱詳音

義勞力報反注同來本又作勑力代反本或作賁強其丈反注同翦子淺反簪本又作彗同息遂反又徂歲反迨疏皆為勤勞也勞來者以其有勤勞也自勉強者音待疏亦為勤由能事事有功者亦為勤注云職勞不

來者小雅大東文人以不被勞來者為不見勤故采薇序曰扶杜以勤之即是勞來也云迨其謂之者召南標有梅文也

悠傷憂思也注皆感思也音義

傷字書作傷尸羊反思司嗣反注同疏皆

思也悠者秦風渭陽云悠悠我思傷者周南卷耳云維以不永傷憂者愁思也

懷惟慮願念愁思也注詩曰愁如調飢音義

愁乃歷反調竹留反

毛詩傳疏

皆思念也方言云鬱悠懷愁惟慮願念靖慎云朝也思也晉宋衛魯之間謂之鬱悠惟凡思也慮

謀思也願欲思也念常思也東齊海岱之間曰靖秦晉或曰慎凡思之貌亦曰慎或曰愁舍人曰愁志而不得

之思也注云愁如調飢者周南汝墳文

祿祉履戩祱禧禔祐福也注詩曰福履綏之俾爾戩穀

祱祿康矣禔禧書傳少見其義未詳音義

祉音恥戩音翦又章善反

孫音箭祱音廢又音拂又方妹反禧許其反禔音戶俾必爾反疏也福祿對文則小異散則祿亦福也商頌玄鳥云百祿是何鄭箋謂當擔負天之多福祉者繁多之福也周頌烈文云錫爾祉祐祐者小雅信南山云受天之祐注云詩曰福履綏之者周南樛木文云俾爾戩穀者小雅天保文云祱祿康矣者大雅卷阿文

禔祀祠蒸嘗禴祭也注書曰禔于六宗餘者皆以為四

時祭名也音義

禔音因注同祀音似祠音詞周春祭名蒸之升反冬祭名嘗字又作常秋祭名

禴字又作𦵏同

疏

皆祭之別名祭際也人神交際說文

餘若反夏祭名云從示從又從肉又手也以手持肉

示神所以祭也禋者說文云潔祀也祀者說文云祭無

己也餘者四時祭名疏具釋天注云禋于六宗者虞書

舜典文孔安國云精意以享謂之禋宗尊也所尊祭者

其祀有六謂四時也寒暑也日也月也星也水旱也

儼恪祗翼謹恭欽寅燠敬也注儼然敬貌書曰夙夜惟

寅詩曰我孔燠矣謹未詳音義音夷反謹音因又音真

燠而善反郭音罕說文蒼頡篇皆同疏皆謂謹敬也儼者郭云儼然敬貌

敬也周書微子之命云恪慎克孝祗者虞書大禹謨云

祗承于帝翼者小心之敬也大雅大明云小心翼翼恭

者敬貌也大雅桑柔云溫溫恭人欽者堯典云欽若昊

天注云書曰夙夜惟寅者虞書舜典文云詩曰我孔燠

矣者小雅
楚茨文

朝旦夙晨駿早也注駿亦明也音義

駿子駿反又音峻

疏早者說文

云晨也從日在甲上十古文甲字今即以不晚為早朝者鄘風蠲蠅云崇朝其雨毛傳云崇終也從旦至食時為終朝旦者說文云明也從日在一上一地也陳風東門之枌云穀旦于差夙者齊風東方未明云不夙則莫晨者說文云晨昧爽也東方未明云不能晨夜駿亦明之早也

頤俟替戾厖止俟待也注書曰俟我后今河北人語亦

然替戾厖者皆止也止亦相待也音義

頤音須俟音仕字又作俟亦作

祀音同替他計反戾音麗厖之視反字宜疏皆相待也從一或作底非也底音丁禮反俟胡禮反頤者邳風

匏有苦葉云卬須我友俟者齊風著篇云俟我于著乎而頤須俟俟音義同替戾厖底者郭云皆止也止亦相待也注云俟我后者商書太甲文

噉幾裁殆危也注幾猶殆也噉裁未詳音義噉郭音聿施音述幾

音析又音疏皆危險也說文云危在高而懼幾者幾猶機裁音哉殆也周書顧命云無以釗冒貢于非幾殆

者小雅節南山云無小人殆

譏汔也注謂相摩近音義譏音祈又音沂郭音剡案剡音公哀反說文云摩也汔古

愛反施音既樊孫虛乞反疏說文云剡摩也郭讀譏為摩莫河反近附近之近剡云謂相摩近孫炎云汔

近也大雅民勞云汔可小康鄭箋云汔幾也反覆相訓故汔得為幾也昭十年左傳亦引此詩杜預云汔期也

然則期字雖別皆是近義言其近當如此史記稱漢高祖欲廢太子周昌曰臣口不能言然臣期知其不可陛下雖欲廢太子臣期不奉詔言期者意亦與此同也

治肆古故也注治未詳肆古見詩書音義

治如字施直吏反肆音四

疏肆之為故語更端辭也商書湯誥曰肆台小子古之為故謂舊故也周頌良耜云續古之人

肆故今也注肆既為故又為今今亦為故故亦為今此

義相反而兼通者事例在下而皆見詩疏詩大雅縣篇云肆不殄厥

愠毛傳云肆故今也即以肆之一字為故今因上起下之語郭氏字別為義云肆既為故又為今今亦為故故亦為今此義相反而兼通者事例在下在下者謂在下文徂在存也注

惇 亶 祐 篤 擊 仍 𦵏 埤 竺 腹 厚 也 注 頻 仍 埤 益 𦵏 輔 皆 重

厚 擊 然 厚 貌 餘 皆 見 詩 書 音 義

惇 字 又 作 惇 丁 門 反 亶 多 但 反 祐 音 戶 擊 却 賢

反 又 苦 間 苦 忍 二 反 仍 本 或 作 仍 同 汝 丞 反 𦵏 音 毗 本 或 作 脾 同 埤 避 支 反 又 音 裨 竺 字 又 作 篤 同 丁 毒 反 腹 分 伏 反 重 疏 皆 重 厚 也 惇 者 周 書 武 成 云 惇 信 明 義 亶 直 龍 反 疏 者 誠 之 厚 也 大 雅 桑 柔 云 逢 天 憚 怒 小 雅 天 保 云 俾 爾 單 厚 周 頌 昊 天 有 成 命 云 單 厥 心 皆 訓 厚 也 亶 亶 單 音 義 同 祐 者 福 厚 也 篤 者 周 頌 維 天 之 命 云 曾 孫 篤 之 擊 然 厚 貌 頻 仍 埤 益 𦵏 輔 皆 重 厚 釋 天 云 仍 饑 為 荐 邶 風 北 門 云 政 事 一 埤 益 我 小 雅 節 南 山 云 天 子 是 𦵏 又 采 菽 云 福 祿 膍 之 𦵏 𦵏 膍 音 義 同 竺 與 篤 同 腹 者 小 雅 蓼 莪 云 出 入 腹 我 月 令 云 水 澤 腹 堅

載 謨 食 詐 偽 也 注 載 者 言 而 不 信 謨 者 謀 而 不 忠 書 曰

朕不食言音義

謨亡胡反郭音慕詐側駕反謀亡侯反

疏皆虛偽也郭云

謨者謀而不忠者以載詁為言謨為謀今又為偽故以為言而不信謀而不忠不信不忠則是偽也食者孫炎曰食言之偽也哀二十五年左傳云孟武伯惡郭重曰何肥也公曰是食言多矣能無肥乎然則言而不行如食之消盡後終不行前言為偽故通謂偽言為食言故此訓食為偽也許者方言云膠譎詐也涼州西南之間曰膠自關而東西或曰膠詐通語也注朕不食言商書湯誥文

話猷載行訛言也注詩曰慎爾出話猷者道道亦言也

周禮曰作盟詛之載今江東通謂語為行世以妖言為

訛音義

話胡快反猷音由字亦從才行下庚反郭下孟反注同訛字又作訛亦作譌同五戊反盟音明

詛側慮反疏皆謂言辭也話者善言也孫炎曰善人之妖於喬反疏言也猷者道也道亦言也載者載於簡策之謂也郭云今江東通謂語為行世以妖言為訛注云詩曰慎爾出話者大雅抑篇文云周禮曰作盟詛之載者春官詛祝職文也

遘逢遇也注謂相遘遇遘逢遇遘也注轉復為相觸遘遘逢遇遘見也注行而相值即是見音義遘古豆反遘字又作迂同

五故反復疏皆謂相遭遇觸遘而相見也召南草蟲云扶又反疏亦既遘止周書洪範云子孫其逢吉鄭風野有蔓草云邂逅相遇轉復相訓三者又為相觸遘遘逢遇遘四者皆行而相值之名行而相值即見故又為見

顯昭覲釗覲見也注顯昭明見也逸書曰釗我周王音

義

釗工堯反又章堯反見賢通反注同疏顯昭皆明見也周頌敬之云天

釗覲者皆下見上也曲禮云天子當依而立諸侯北面而見天子曰覲郊特牲云不敢私覲注云逸書者不在

今尚書之

內故曰逸

監瞻臨泣頻相視也注皆謂察視也音義

監音鑒又工杉反字又作

臨泣音利又音類頻他弔疏皆謂察視也小雅節南山反相施息亮反又息良反云何用不監又曰民具爾

瞻大雅大明云上帝臨汝文王世子云成王幼不能蒞詐頻者考工記云瑑圭璋八寸璧琮八寸以頻聘鄭注

云頻視也聘問也衆來曰頻特來曰聘相者小雅小弁云相彼投兔

鞠訕溢盈也注詩曰降此鞠訕音義

訕音凶

疏皆謂盈多

皆盈多也降此鞠訕小雅節南山文毛傳云鞠盈訕訕也鄭箋云盈猶多也以盈者必多故鄭轉云盈猶多也

孔魄哉延虛無之言間也注孔穴延魄虛無皆有間隙

餘未詳音義

間古閑反隙也音閑隙去戟反

舊疏

間謂間隙也孔者孔穴小雅角弓云如酌

孔取魄者形也謂月之無光之處名魄也康誥云惟三月哉生魄延者今墓道也虛無者虛無所有也是皆有

間隙也

瘞幽隱匿蔽竄微也注微謂逃藏也左傳曰其徒微之

是也音義

瘞猗例反郭音翳匿女力反蔽必曳反竄竄亂反

疏

微謂逃藏也瘞者埋藏之微也

幽者深微也隱者潛隱而微也匿者舍人曰藏之微也
蔽者覆障使微也竄者行之微也是皆微昧不顯揚也
○案昭十七年傳云楚白公勝作亂殺子西子期葉公
子高至遇箴尹固帥其屬將與白公子高曰微二子者
楚不國矣棄德從賊其可保乎乃從葉公使與
國人以攻白公白公奔山而縊其徒微之是也

訖徽妥懷安按替戾底廢尼定曷遏止也注妥者坐也

懷者至也按抑按也替廢皆止住也戾底義見詩傳國

語曰戾久將底孟子曰行或尼之今以逆相止為遏徽

未詳音義

妥孫他果反郭他回反又他罪反劉昌宗音儀禮同字林亦同按一旦反底之視反尼施

女乙反謝羊而反曷何末反遏烏割反抑於力反

疏

皆謂止住也訖者終止也妥者坐止也懷至止也安

休止也抑按替廢皆止住也大雅云以按徂旅小雅云勿替引之定者靜止也曷者俗以抑止為曷今以逆相止為過餘皆見注注云戾底義見詩者小雅采芣云亦是戾矣底者在物之下是亦止也凡注言見詩今毛詩無者蓋在齊魯韓詩也云國語曰戾久將底者案晉語云文公在翟十二年狐偃曰日吾來此也非以翟為榮可以成事也吾曰奔而易達困而有資休以擇利可以戾也今戾久矣戾久將底底著滯淫誰能興之盍速行乎是其事也云孟子曰行或尼之者案孟子魯平公將見孟子嬖人臧倉止之樂正子見孟子曰克告於君君為來見也嬖人有臧倉沮君君是以不來也曰行或使之止或尼之行止非人所能也吾之不遇魯侯天也臧氏之子焉能使予不遇哉是其事也此云行或尼之所見本異或傳寫誤

豫射厭也注詩曰服之無數豫未詳音義

射羊石反字又作數同厭

於豔疏謂厭倦也注云詩曰服之反

無數者周南葛覃文也

烈績業也注謂功業也疏

謂功業也烈者周頌執競云無競維烈績者大雅文王有

聲云維禹之績

績勲功也注謂功勞也疏

謂功勞也績者虞書大禹謨云嘉乃丕績勲者案周禮司

勲職云王功曰勲鄭注云輔成王業若周公

功績質登平明考就成也注功績皆有成詩曰質爾民

人禮記曰年穀不登穀梁傳曰平者成也事有分明亦

成濟也疏

皆謂成濟也勲功績業皆有成也事有分明亦成濟也舜典云三載考績周頌敬之云日

就月將皆言成功也注云詩曰質爾民人者大雅抑篇
文云禮記曰年穀不登者下曲禮文云穀梁傳曰平者
成也者宣十
五年文也

桔梗較頤庭道直也注桔梗較頤皆正直也詩曰既庭

且碩頤道無所屈音義

桔古沃反郭音角梗古杏
反較古學反頤他鼎反

疏桔
梗

較頤皆正直也庭條直也道者頤道無
所屈注云既庭且碩者小雅大田文

密康靜也注皆安靜也音義

密亡
筆反疏

皆安靜也周頌昊天有成命夙夜基

命宥密大雅生
民云不康裡祀

豫寧綏康柔安也注皆見詩書疏

皆安樂也大雅板篇
云不敢戲豫虞書大

禹謨云萬邦咸寧商書太甲云撫綏萬邦大雅民勞云汜可小康虞書舜典云柔遠能邇

平均夷弟易也注皆謂易直音義

易以政疏也易者不難反注同疏也

一皆易直也周頌天作云岐有夷之行大雅泂酌云愷弟君子

矢弛也注弛放弛易也注相延易音義

弛尸紙反易音亦顧謝本弛作

施并易皆以政反注同

疏郭云矢弛也以弓釋弦曰弛故云弛放禮記雜記云一張一弛弛又為易謂相

延易也

希寡鮮罕也注罕亦希也鮮寡也注謂少音義

鮮息淺反下同

罕火疏皆簡少之稱也論語云希不失矣易說卦云巽罕反疏為寡髮大雅抑篇云鮮不為則郭云罕亦希也

鄭風大叔于田云叔發罕忌鮮又為寡轉互相訓皆謂希少爾

酬酢侑報也注此通謂相報答不主于飲酒音義

酢才各反

侑本或作宥

疏

皆相報答也郭云此通謂相報答不主于飲酒者以飲酒之禮主人酌酒於賓

曰獻賓既卒爵洗而酌主人曰酢主人既卒酢爵又酌自飲卒爵復酌進賓曰酬故說者以酬酢主謂飲酒相報答郭以易繫辭云可與酬酢謂應對萬物也小雅楚茨云萬壽攸酢是神報主人也故云不主于飲酒侑者案公食大夫賓禮三飯之後云公受宰夫束帛以侑注云束帛十端帛也侑猶勸也主國君以為食賓慇懃之意未至復發幣以勸之欲其深安

賓也是侑者主人所以報賓也

毗劉暴樂也注謂樹木葉缺落蔭疏暴樂見詩音義

毗如

字樊光本作庇云蔭也暴本又作爆同邦角反樂舍
本又作爍郭音洛又力角反蔭於禁反又作廕同疏人
曰毗劉暴樂之意也木枝葉稀疏不均為暴樂注云謂
樹葉缺落蔭疏暴樂見詩者大雅桑柔云捋采其劉毛
傳云劉爆爍而希也是矣

覲髮莠離也注謂草木之叢茸翳薈也莠離即彌離彌

離猶蒙龍耳孫叔然字別為義失矣音義覲郭亡革反又莫經反髮

音蒙莠音弗叢才工反茸如疏郭云謂草木之叢茸翳
容反或如融反薈烏會反疏薈也莠離即彌離彌離
猶蒙龍耳孫叔然字別為義失矣郭以時驗
而為此解孫氏每字各別為義故云失矣

蠱謫貳疑也注蠱惑有貳心者皆疑也左傳曰天命不

謫音義

蟲音古謫郭音緇他刀疏皆謂疑惑也郭云蟲反字或作惱沈勣檢反惑有貳心者皆疑也

者案昭元年左傳晉趙孟問於醫和曰何謂蟲對曰淫弱惑亂之所生也於文皿蟲為蟲穀之飛亦為蟲在周易女惑男風落山謂之蠱是蠱惑也貳者心疑不一也大雅大明云無貳爾心毛傳云無敢懷貳心也注云左傳曰天命不謫者哀十七年葉公子高辭也

楨翰儀榦也注詩曰維周之翰儀表亦體榦音義

楨音榦

本又作幹胡疏舍人曰楨正也築牆所立兩木也所以旦反又作翰當牆兩邊障土者也大雅文王云維周之楨又崧高云維周之翰儀表亦體榦也

弼棐輔比輔也注書曰天威棐忱易曰比輔也輔猶輔

也音義

裴音匪比毗志反注同備音輔疏補猶輔也弼

云夢帝賚予良弼裴者周書康誥云天威裴忱輔者商書湯誓云爾尚輔予一人比者易比卦彖云比輔也

疆界邊衛圉垂也注疆場境界邊旁營衛守圉皆在外

垂也左傳曰聊以固吾圉也音義廣雅云界也旁步郎

反聊疏謂四垂也郭云疆場境界邊旁營衛守圉皆在音遼外垂也舍人曰圉拒邊垂也孫炎曰圉國之四

垂也注云聊以固吾圉也者隱十一年鄭伯辭也

昌敵彊應丁當也注書曰禹拜昌言彊者好與物相當

值音義

敵音狄彊巨良反下注同應本疏皆相當也昌或作膺同於矜反好呼報反者言當也敵

者仇匹相當也文六年左傳曰敵惠敵怨彊者好與物相當值應者對當也大雅下武云應侯順德丁者雲漢云寧丁我躬注云禹拜昌言者虞書大禹謨文

淳肩搖動蠢迪倂厲作也注淳然興作貌蠢動作也公

羊傳曰倂甚也穀梁傳曰始厲樂矣肩見書迪未詳音

義淳步忽反蠢尺疏皆興作也淳然興作貌莊公十一允反倂昌育反疏年左傳曰禹湯罪己其興也淳然

肩者勝任之作也搖者商書咸有一德云德惟一動罔不其豐殺之節也動者商書咸有一德云德惟一動罔不吉蠢者鄉飲酒義云春之為言蠢也倂者始作也厲者方言云厲印為也甌越曰印吳曰厲為亦作也注云公羊傳曰倂甚也者隱九年云三月庚辰大雨何以書記異也何異爾倂甚也云穀梁傳曰始厲樂矣者隱五年

云九月考仲子之宮初獻六羽始僭樂矣尸子曰舞夏自天子至諸侯皆用八佾初獻六羽始厲樂矣

茲斯咨咎已此也注咎已皆方俗異語音義

咎子爾反或子移反

郭音些案廣雅些辭也息計反疏此者對彼之稱言近又息賀反謂語餘聲也已音以在是也茲者虞書大禹謨云念茲在茲斯者召南殷其雷云何斯違斯咨與茲同咎已與此皆音相近故得為此也郭云咎已皆方俗異語

嗟咨嗟也注今河北人云嗟歎音免置之音義

嗟本或作

嗟字林云皆古

疏皆歎也周南卷耳云嗟我懷人堯典云疇咨若時登庸郭云今河北人云

嗟歎

開狎串貫習也注串厭串貫貫快也今俗語皆然音義

狎乎甲反串郭音五患反沈謝古患反貫古患反厭於
豔反快音逝又時設反張揖雜字音曳云狎快過度

疏皆便習也莊二十二年左傳曰赦其不閑於教訓曲
禮曰賢者狎而敬之大雅皇矣云串夷載路齊風猗

嗟云射則貫兮皆是習也注云串厭串貫貫快也今俗
語皆然者當東晉時有此厭串貫快之語故以為證也

曩塵佇淹留久也注塵垢佇企淹滯皆稽久也音義

曩奴

黨疏曩曩塵垢佇企淹滯留
反止皆稽久也通見詩書

逮及暨與也注公羊傳曰會及暨皆與也逮亦及也音

義逮音代一音大疏皆相親與也注云公羊傳曰會及
計反暨其器反暨皆與也者隱元年文也云逮亦

及也者
方言文

隲假格陟躋登陞也注方言曰魯衛之間曰隲梁益曰

格禮記曰天王登遐公羊傳曰躋者何陞也音義隲之

實反

又音陟假音遐躋疏皆謂陞上陟者周南卷耳云陟彼
子兮反陞音升高岡餘見注注云方言曰者案彼

云躋郅跂格躋踰登也自關而西秦晉之間曰躋東齊
海岱之間謂之躋魯衛曰郅梁益之間曰格或曰跂隲
郅格格音義同云禮記曰天王登遐者下曲禮文云公
羊傳曰躋者何陞也者文二年文也○郅音質跂音企

踰音
躍

揮盃歇酒竭也注月令曰無灋陂池國語曰水涸而成

梁揮振去水亦為竭歇通語音義

揮許韋反盞音鹿歇
虛謁反涸戶各反瀝

音鹿去

疏

皆謂竭盡也揮者郭云揮振去水亦為竭曲

起呂反

禮

曰執玉器者弗揮是也盞即瀝也郭云歇

通語謂歇即竭之通語也涸水竭也注云月令曰無瀝

陂池者按月令仲春之月是月也無竭川澤無瀝陂池

無焚山林鄭注云順陽養物也畜水曰陂穿地通水曰

池云國語曰水涸而成梁者案周語定王使單襄公聘

於宋遂假道於陳以聘楚單子歸告王曰陳侯不有大

咎國必亡王曰何故對曰夫辰角見而雨畢天根見而

水涸本見而草木節解駟見而隕霜火見而清風戒寒

故先王之教曰雨畢而除道水涸而成梁草木節解而

備藏隕霜而冬裘具清風至而修城郭宮室今陳國火

朝覲矣而道路若塞野場若棄澤不陂障川無舟梁是

廢先王之教也引

之者證涸為水竭

拒拭刷清也注振訊收拭掃刷皆所以為潔清音義

音拒

震拭音式刷字又作𦘔所劣反說文云刮也廣雅云
削也清如字劉音儀禮慈性反收亡粉反掃素老反
郭云振訊收拭掃刷皆所以為潔清禮記喪大記云拒
用巾哀十四年公羊傳云反袂拭面周禮凌人職云夏
頒冰掌事秋刷後鄭云秋
涼冰不用可以清潔其室

鴻昏於顯間代也注鴻雁知運代昏主代明明亦代昏

顯即明也間錯亦相代於義未詳音義

間古莧反注同
謝古閑反郭古

雁反施疏

皆謂更代也注云鴻雁知運代者鴻雁之屬
胡瞎反九月而南正月而北是知其時運而更代南

北也云昏主代明者釋經昏字也日入後二刻半為昏
昏來則明往故云昏主代明云明亦代昏者釋經顯字

也顯即明也云間錯亦相代者謂間則交錯亦相更代也儀禮鄉飲酒云乃間歌魚麗鄭注云間代也謂一歌則一吹是也又周頌桓篇云皇以間之

饁饌饋也注國語曰其妻饁之音義

饁于輒反字林于怯反饌式亮反饋

也本或作餽

疏

饋者以食遺與也野饋曰饁食人曰饌同巨愧反自家之野也注云國語曰其妻饁之者

晉語云臼季使過冀冀缺耨其妻饁之敬相待如賓從而問之冀芮之子與之歸既復命而進之曰臣得賢人敢以告是也

遷運徙也注今江東通言遷徙音義

遷七延反注疏謂同徙斯尔反

移徙也大雅皇矣云帝遷明德易曰日月運行注云今江東通言遷徙者時驗而言也

秉拱執也注兩手持為拱音義

拱九疏皆謂持執也周書金縢云植璧

秉珪注云兩手持為拱者老子云雖有拱壁

廡熙興也注書曰庶績咸熙廡見周官音義

廡郭音歆又音欽字

林火欽反興如字又許應反

疏

皆謂興作注云書曰庶績咸熙者虞書舜典文云廡見周官者即周禮也

笙師職云大喪廡其樂器鄭注廡興也興謂作之

衛蹶假嘉也注詩序曰假樂嘉成王也餘未詳音義

居蹶

衛反下同疏

謂嘉美也注云詩序曰假樂嘉成王也者大雅假樂篇序也

廢稅赦舍也注詩曰召伯所稅舍放置音義

廢字亦作穢同甫穢

反稅始銳反疏皆舍置也廢者宣八年公羊傳云廢其
舍音捨注同肆赦注云詩曰召伯所稅者召南甘棠文也

棲遲慙休苦歟歟息也注棲遲遊息也苦勞者宜止

息慙見詩歟歟皆氣息貌今東齊呼息為呬也音義

棲音西遲直釐反慙起例反本或作惒同呬苦怪反又
墟季反字林以為喟邱愧反孫本作快郭音苦槩反又
作噴墟愧苦怪二反歟郭施謝海拜反孫虛貴疏皆止
反顧乎被反呬郭許四反孫許器反施火季反疏息也
舍人曰棲遲行步之息郭云棲遲遊息也陳風衡門云
衡門之下可以棲遲慙者召南甘棠云召伯所慙休者
止而息也周南漢廣云不可休息苦者郭云苦勞者宜
止息歟歟四者郭云皆氣息貌案方言云餽喙呬息也

周鄭宋沛之間曰餽自關而西秦晉之間或曰喙或曰餽東齊曰咽故郭云今東齊呼息為咽也

供峙共具也注皆謂備具音義

供如字又居用反峙直紀反共音恭疏謂

備具也供者論語云子路共之供共音義同時者周書費誓云峙乃糗糧周頌臣工云痔乃錢鏹峙痔音義同

共者小雅小旻

云靜共爾位

惓惓惠愛也注惓韓鄭語今江東通呼為憐音義

惓亡矩反

又音無憐

疏

愛謂寵惜也方言云憊憊憐牟愛也韓鄭

力田反

曰憊晉衛曰憊汝潁之間曰憐宋魯之間

曰牟秦或曰憐憐通語也故郭云惓韓鄭語今江東呼為憐憊義同惠者仁愛也邶北風云惠而好我○憊亡

輔反憊

音淹

娠蠢震難妯騷感訛蹶動也注娠猶震也詩曰憂心且

妯無感我悅兮或寢或訛蠢難騷蹶皆搖動貌音義指

慎反又音身蠢尺允反難奴板反妯顧依詩勑留反郭

盧篤反又徒歷反騷蘇刀反訛五禾反悅始銳反毛詩

傳云佩疏皆謂動作娠者說文云妊娠動也郭云娠猶

巾也震也者以大雅生民云載震載夙昭元年左

傳曰邑姜方震大叔哀元年左傳曰后緡方震皆謂有

身為震故云娠猶震也蠢者郭云蠢難騷蹶皆搖動貌

小雅采芑云蠢爾蠻荆震者大雅常武云震驚徐方難

者恐動也商頌長發云不難不疎騷者大雅常武云徐

方繹騷蹶者大雅縣篇云文王蹶厥生注云詩曰憂心

且妯者小雅鼓鍾文云無感我悅兮者召南野有死麕

文云或寢或訛

者小雅無羊文

覆察副審也注覆校察視副長皆所為審諦音義

覆芳福反

後注同副音赴校音教長丁

疏郭云覆校察視副長皆所為審諦覆者月令季

春云命舟牧覆舟五覆五反察者周書呂刑云惟察惟法副者次長之稱

契滅殄絕也注今江東呼刻斷物為契斷音義

契郭苦計反字

又作挈顧苦結反注同左傳云盡借邑人之疏皆謂斷車契其軸是也殄大典反刻音克斷大管反絕契者郭云今江東呼刻斷為契斷定九年左傳曰盡借邑人之車契其軸注杜預云契刻也滅者小雅正月云寧或滅之殄者大雅桑柔云不殄心憂

郡臻仍迺侯乃也注迺即乃餘未詳疏

乃語辭也迺乃音義同大雅綿

篇云廼慰
廼止是也

迪繇訓道也注義皆見詩書音義

迪音狄繇音由道如字或徒報反非疏

虞書大禹謨云惠迪吉小雅巧言云秩秩大猷猷繇音義同又周書顧命云命汝嗣訓

僉咸胥皆也注東齊曰胥見方言音義

僉七廡反疏謂胥息廡反衆

皆也舜典云僉曰伯禹作司空商書云咸有一德注云東齊曰胥見方言者案方言云僉胥皆也自山而東五國之郊曰僉東齊曰胥是也

育孟耆艾正伯長也注育養亦為長正伯皆官長音義

耆巨之反禮記云六十曰耆艾五蓋疏皆謂長上也郭反下同禮記曰五十曰艾長丁丈反云育養亦為長

邶谷風云既生既育鄭箋云育謂長老也孟庶長也又周書康誥云王若曰孟侯孔安國云孟長也五侯之長耆艾皆老長也曲禮曰五十曰艾服官政六十曰耆指使正伯皆官長大雅雲漢云以戾庶正盤庚云邦伯師長

艾歷也注長者多更歷音義

庚更音

疏

艾又為歷郭云長者多更歷

歷秭算數也注歷歷數也今以十億為秭論語云何足

算也音義

秭音姊算字又作算素緩反郭息轉反數色具反注同謝色主反

疏

皆算數也郭云

歷歷數也推律所生之數虞書大禹謨云天之歷數在汝躬秭者周頌豐年云萬億及秭毛傳云數萬至萬曰億數億至億曰秭郭云今以十億為秭者以時驗而言也注論語云何足算也者案論語子貢問曰今之從政

者何如子曰噫斗筭之人何足算也鄭曰算數也

歷傳也注傳近音義

歷郎擊反傳疏謂傳近也隱十一年左傳云庚辰傳

於許

艾歷覲胥相也注覲謂相視也公羊傳曰胥盟者何相

盟也艾歷未詳音義

覲字又作脈亡革反相息羊疏皆反讀者或息亮反今不用

相視也覲者郭云覲謂相視也說文云覲邪視也注云公羊傳曰胥盟者何相盟也者桓三年文

乂亂靖神弗渥治也注論語曰予有亂臣十人渥書序

作汨音同耳神未詳餘見詩書音義

乂字又作雙亦作刈同魚廢反渥郭

古沒反又胡忽反治直疏皆治理也舍人曰亂義之治
吏反謝如字汨古沒反也孫炎曰亂治之理也注云
論語曰予有亂臣十人者泰伯篇文也云澠書序作汨
音同耳者虞書序云帝釐下土方設居方別生分類作
汨作孔傳云汨治作興也言其治民之功興故為汨作
之篇亡云餘竝見詩書者舜典云有能俾乂小雅菀柳
云俾予靖之大雅生民云
弗厥豐草弗弗音義同

頤艾育養也注汝潁梁宋之間曰艾方言云音義頤以反

疏頤者易曰頤貞吉育者易无妄象曰先王以茂對時
育萬物注云汝潁梁宋之間曰艾方言云者案方言

云台胎陶鞠養也晉衛燕趙曰台陳楚韓鄭之間
曰鞠秦或曰陶汝潁梁宋之間曰胎或曰艾也

汰渾隕墜也注汰渾皆水落貌音義汰姑大反施胡大反顧徒盖反宜作

汰渾胡本反隕于疏皆墜落也郭云汰渾皆水落貌春
敏反墜直類反秋僖公十六年經云星隕如雨

際接翼捷也注捷謂相接續也音義捷才接反疏郭云

相接續也際者相會之捷也左傳曰爾未際也小雅苑
柳云無自療焉鄭箋云療接也接者曾子問云接祭而

已謂捷速而祭也翼者未詳

毖神溢慎也注神未詳餘見詩書音義溢音逸疏謂謹
慎也

毖者周書洛誥云夙夜毖祀溢者舍人曰溢行之
慎周頌維天之命云假以溢我故注云見詩書

鬱陶繇喜也注孟子曰鬱陶思君禮記曰人喜則斯陶

陶斯詠詠斯猶猶即繇也古今字耳音義陶徒刀反繇
音由一音遙

疏曰鬱陶思君者案孟子象往入舜宮舜在牀琴象曰鬱陶思君爾忸怩趙氏注云象見舜正在牀鼓琴愕然反辭曰我鬱陶思君故來爾辭也忸怩而慙是其情也云禮記曰人喜則斯陶陶斯詠詠斯猶者下檀弓文鄭注云鬱陶陶也咏謳也猶當為搖聲之誤也搖謂身動搖也秦人猶搖聲相近云猶即繇也古今字耳者言禮記猶即此經繇也古今字異耳

馘穢獲也注今以獲賊耳為馘獲禾為穢竝見詩音義

馘古獲反本又作馘音同穢本作齊疏皆謂克獲也注同才細反依注字宜從禾獲戶郭反疏云今以獲賊耳為馘者大雅皇矣云攸馘安安毛傳云不服者殺而獻其左耳曰馘魯頌泮水云在泮獻馘鄭箋云馘所格首之左耳皆謂臨陳格殺之而取其耳也云獲禾為穢者小雅大田云此有不斂穢穢者禾之鋪而未束故云獲

禾為穡是
並見詩

阻艱難也注皆險難音義

難奴旦反注疏皆險難也秦
同音如字風蕪葭云道

阻且長商書說
命云非知之艱

剡矧利也注詩曰以我剡耜音義

剡羊冉反矧力約反
詩本作略耜音似

疏皆耜之利也小雅大田云以我覃耜剡耜音
義同周頌載芟云有略其耜耜略音義同

允任壬佞也注書曰而難任人允信者佞人似信壬猶

任也音義

任而鵠反又而淫反疏皆謂諂佞也允信也
注同壬而今反注同佞人似信任者孫炎

云似可任之佞也虞書舜典云而難任人壬
猶任也臯陶謨云何畏乎巧言令色孔壬

俾拼抨使也注皆謂使令見詩俾拼抨使從也注四者

又為隨從音義

俾必尔反拼北萌反以利使人曰拼從手抨普耕反案字書拼抨並音普耕補

耕二反訓義亦同今既二字相隨故多互其讀也

疏皆

亦從手彈也字又作倅音同使人也令力呈反

疏謂

使令隨從也注云見詩者魯頌閟宮云倅爾熾而昌大

雅桑柔云并云不逮拼并音義同抨義亦同此皆為使

令也倅拼抨使

四者又為隨從

儼仍因也注皆謂因緣音義

儼樊孫如羊反引論語其父攘羊釋之作攘注云因

來而盜曰攘

疏

皆因緣也費誓曰無敢寇攘鄭注云因其亡失曰攘儼攘音義同施博士讀曰

施息羊反

襄周書君奭云襄我二人郭無

明說義得兩通論語云仍舊貫

董督正也注皆謂御正音義

督多毒反疏皆謂御正也虞書

威春秋僖公十三年

左傳云謂督不忘

享孝也注享祀孝道音義

享虛丈反下注同

疏

享祀孝道也小雅信南山云享

於祖考

珍享獻也注珍物宜獻穀梁傳曰諸侯不享覲疏

致物於尊

者曰獻珍者珍物宜獻也享者周禮大行人云廟中將幣三享鄭司農云三享三獻也注云穀梁傳曰諸侯不

享覲者隱

五年文

縱縮亂也注縱放掣縮皆亂法也音義

縱于用反縮所六反掣昌世反

疏縱放掣縮皆亂法也大
雅民勞云無縱詭隨

探篡俘取也注書曰俘厥寶玉篡者奪取也探者摸取

也音義

探吐南反篡初惠反俘音孚摸亡各樓胡二反

疏

郭云探者摸取也篡者奪取也李巡曰囚

敵曰俘伐執之曰取注云書曰俘厥寶玉者商書序云夏師敗績湯遂從之遂伐三腹俘厥寶玉孔氏云俘取也

徂在存也注以徂為存猶以亂為治以曩為曩以故為

今此皆詁訓義有反覆旁通美惡不嫌同名音義

治直吏反

曩乃朗反疏鄭風出其東門云匪我思且鄭箋云非我
曩許亮反思存也徂且音義同在訓存者常語也上

云徂往也往則非存故郭氏引類以曉人也注云美惡不嫌同名者案隱七年公羊傳云貴賤不嫌同號美惡不嫌同辭何休云若繼體君亦稱即位繼弒君亦稱即位皆有起文美惡不嫌同辭是也若此篇往也死也亦稱徂是惡也存也亦稱徂是美也各有其義故云美惡不嫌同名

在存省士察也注書曰在璫璣玉衡士師官亦主聽察

存即在音義

省息井反璫音旋又作璇

疏

謂審察也虞書舜典云在璫璣玉衡以齊七政存即

在也省謂視察吾日三省吾身士者理獄之官亦主聽察虞書舜典舜命皋陶云汝作士

烈枿餘也注晉衛之間曰枿陳鄭之間曰烈音義

枿五割反

本或作枿又作木注作枿並同說文作櫟以枿木為古文藥為或體云伐木之餘

疏

謂遺餘也詩大雅雲

漢序云宣王承厲王之烈李巡曰枿槁木之餘也商書盤庚云若顛木之有由藥枿藥音義同注云晉衛之間曰藥陳衛之間曰烈者方言文

逌迎也注公羊傳曰跛者逌跛者音義

逌五駕反疏謂跛布我反相

逢迎也注云公羊傳曰跛者逌跛者此成二年傳文案彼云晉卻克與臧孫許同時而聘于齊蕭同姪子者齊君之母也踊于楮而窺客則客或跛或眇於是使跛者逌跛者眇者逌眇者是也引之以證逌為迎也宣三年左傳曰狂狡輅鄭人杜注云輅迎也周禮秋官有訝士及聘禮云厥明訝賓于館鄭注皆云訝迎也召南鵲巢云百兩御之鄭注云御迎也字形雖別音義實同蓋以作非一人致茲異也當以逌為正字餘皆假借

元良首也注左傳曰狄人歸先軫之元良未聞音義軫

忍疏謂頭首也注云左傳曰狄人歸先軫之元者僖三
反疏十三年狄伐晉及箕八月戊子晉侯敗狄于箕卻
缺獲白狄子先軫曰匹夫逞志於君而無討敢不自討
乎免胄入狄師死焉狄人歸其元面如生是也引證元
為首良未詳

薦摯臻也注薦進也摯至也故皆為臻臻至也音義薦遭

練反摯之二疏臻至也薦進執摯
反臻則巾反疏皆所以表至也

賡揚續也注書曰乃賡載歌揚未詳音義賡古孟反沈
孫音庚說文

以為古文讀疏謂相繼續也注云書曰乃
續似欲反賡載歌者虞書益稷文

祔褹祖也注祔付也付新死者於祖廟褹毀廟主音義

祔音附郭音疏謂先祖也說文云祔後死者合食於先

付祔俱毀反疏祖也郭云祔付也付新死者於祖廟士

虞記云明日以其班祔毀廟之主曰祔

即尼也注即猶今也尼者近也尸子曰悅尼而來遠音

義尼本亦作昵同女乙反謝疏尼近言也即

羊而反顧奴啓反下同

今相近也

尼定也注尼者止也止亦定疏尼詰為止止即定舍

人曰尼者私之定也

邇幾暱近也注暱親近也音義幾音機又音疏皆謂殆

祈暱女乙反近也邇

者鄭風東門之墀云其室則邇幾者聘義曰日幾中

而後禮成暱者郭云親近也小雅苑柳云無自暱焉

安安坐也注禮記曰安而后傳命音義安郭他回反沈

他果反傳直孽

反疏

安定之坐也注云禮記曰安而后傳命者案士相見禮曰凡言非對也安而後傳言鄭注云凡言謂

己為君言事也安安坐也傳言猶出言也此言禮記曰安而后傳命者傳寫誤也或所見本異

貉縮綸也注綸者繩也謂牽縛縮貉之今俗語亦然音

義

貉亡白反下同施胡各反綸音倫繩音乘

疏

注云綸者繩也謂牽縛縮貉之今俗語亦然者據時驗而

言也大雅縣篇云其繩則直縮板以載

貉嘆安定也注皆靜定見詩音義

嘆音莫本亦作莫

疏

皆靜定也大雅

皇矣云貉其德音毛傳云貉靜也鄭箋云德正應和曰貉嘆者皇矣文云求民之莫鄭箋云求民之定謂所歸就也貉貉嘆莫音義同安者小雅斯干云乃安斯寢

伊維也注發語辭伊維侯也注詩曰侯誰在矣互相訓

疏

皆發語辭轉互相訓邶谷風云伊余來暨大雅大明云維此文王小雅六月云侯誰在矣

時寔是也注公羊傳曰寔來者何是來也音義

寔音石

疏

是此也秦風駟驥云奉時辰牡注云公羊傳曰寔來者何是來也者案春秋桓五年冬州公如曹六年春正月寔來公羊傳曰寔來者何猶曰是人來也引之證寔為是也

卒猷假輟已也注猷假未詳音義

卒子恤反又作碎下同猷音由假古雅反

輟丁劣反已音以

疏皆謂終已也卒者終壽之已也輟止已也論語云擾而不輟

求酋在卒就終也注詩曰似先公爾酋矣成就亦終也

其餘未詳音義

首在由反又子由反郭音道就如字

疏

皆謂終盡也

求者大雅下武云世德作求郭云詩曰嗣

先公爾酋矣者大雅卷阿文卒者邶風日月云畜我不

卒就者凡事物

成就亦終也

崩薨無祿卒殂落殪死也注古者死亡尊卑同稱耳故

尚書堯曰殂落舜曰陟方乃死音義

薨火弘反殂音徂本又作殂殪於計

反稱尺

疏

此皆死之別稱也曲禮云天子死曰崩諸侯

證反

曰薨大夫曰卒士曰不祿庶人曰死鄭注云

異死名者為人襲其無知若猶不同然也自上顛壞曰

崩薨顛壞之聲卒終也不祿不終其祿死之言漸也精

神漸盡也又曰壽考曰卒短折曰不祿鄭注云祿謂有

德行任為大夫士而不為者老而死從大夫之稱少而

死從士之稱此云無祿者即彼之不祿也徂落者李巡
曰殂落堯死之稱注云古者死亡尊卑同稱耳故尚書
堯曰殂落舜曰陟方乃死者皆虞書舜典文也謂之殂
落者蓋殂為往也言人命盡而往落者若草木葉落也
殂者案隱九年左傳云衷戎師
前後擊之盡殂杜注云殂死也

爾雅注疏卷一

爾雅注疏卷一考證

釋詁第一○鄭樵曰詁故也古人之言也故從言以古人之言於今有訛轉故作釋詁以五方之言於此有異同故作釋言然古人之言亦有五方之異五方之言亦有古今不同故釋詁釋言二篇雖各有注其義互通

權輿始也注胡不承權輿○詩秦風權輿篇作于嗟乎不承權輿

薊旼旼將業蓆大也注薊義未聞○韓詩云薊彼甫田
詩小雅甫田篇本作倬彼甫田韓詩為薊篇海以為
與覃同則又迥非倬義矣鄭樵曰說文云薊艸大也
旼日照之所及也

儀若祥淑鮮省臧嘉令類緜穀攻穀介徽善也注省緜
穀未詳其義○臣照按詩大雅皇矣篇帝省其山鄭

箋省善也又禮大傳省于其君注善于其君謂免于
大難也緜玉篇善也集韻音森或作縻縻衣裳毛

羽垂貌楚辭九懷舒佩兮緜纚木華海賦被羽翮之
褻襪後漢輿服志諸古麗圭褻閨綠加上之服禁絕
之穀孟子羿之教人射必志于穀詩大雅行葦篇敦
弓既句注句穀通射至于穀射之善也

靖惟漢圖詢度咨諏究如慮謨猷肇基訪謀也注如未
詳○臣照按凡曰何如皆謀議未定之辭也如當同
茹詩周頌臣工篇來咨來茹猷與猶同詩小雅小旻
篇謀猶回遘我視謀猶不我告猶哀哉為猶謀又同

謨淮南引皇皇者華之詩作周爰諮謨

黃髮齟齬鮐背耆老壽也注齟齬齟墮更生細者○陸本墮作隋

允孚亶展謨誠亮詢信也注方言曰荆吳淮泗之間曰

展○謨詩大雅蕩之篇天命匪謨說文作天命匪忱

陸本淮泗作淮汭諸本同作淮泗臣照按方言注曰

汭水名也音芮則應從陸本

粵于爰曰也○鄭樵曰粵亦作越通作曰曰於也臣照

按曰古又通作聿王應麟詩攷楚辭章句引詩大雅
縣之篇作予聿有奔走予聿有先後

故郃盍翕仇偶妃匹會合也○臣照按郃本同洽詩大

雅大明篇在郃之陽注洽水名在同州郃陽夏陽縣
今流已絕故去水而加邑正韻洽合也詩小雅正月
篇洽比其鄰注洽比皆合也

急諡溢蟄慎貉諡顓頤密寧靜也注急顓頤未聞其義
○臣照按急集韻欻去聲說文靜也又息也急與忤

同又同忔廣韻靜也史記周本紀棄為兒時忔如巨
人之志謚石經作謚謚詩周頌維天之命篇假以謚
我說文作誡以謚我廣韻作誡以謚我謚同密禮記
引周頌昊天有成命篇夙夜其命宥密賈誼新書叔
向曰宥謚者寧也顓音蠲說文謹莊貌顓音隗說文
頭閑習也注低仰便也廣韻閑習容止也

隕殞湮下降墜標蓋落也○石經殞作碩

命令禧畛祈請謁訊詰告也注禧未聞○臣照按禧本

通鑑史記孝文紀祠官祝釐師古注釐本作禧假借用耳然則禧有告于神明之義故曰告也

矢雉引延順薦劉繹尸旅陳也○陸本矢作戾

尸案也注謂案地○鄭樵曰舊注謂案地非此即察案之案故亦從案而下文又申云案察官也臣照按鄭

樵之意以下文案察官也察官二字連讀郭璞注曰官地為案同官為察則案與察各為句而以官也二字解之若然則兩案字不應覆舉矣故鄭樵不從之

永義引延融駿長也注義所未詳○韓詩外傳引漢廣之詩江之義矣薛漬曰義長也說文作義

犯奢果毅剋捷功肩堪勝也注陵犯誇奢果毅皆得勝也書曰西伯堪黎○陸本誇作夸果作慄黎作鬻鄭樵曰堪亦作戡

疊疊沒孟敦勗釗茂勗勉也注釗孟未聞○臣照

按揚子方言釗薄勉也秦晉曰釗自關而東周鄭之間曰勗釗齊魯曰勗茲又周書釗我周王當是勉意

鄭樵曰孟即啓也皆方俗之語又廣韻勉也班固幽
通賦盍孟晉以迨羣辰倏忽其不再注孟進勉進也
猶猛進也

台朕賚畀卜陽予也○臣照按台同貽又同飴詩周頌

思文篇貽我來牟漢書作飴我釐楚又按朕陽無與
字義賚畀卜無余字義兩不相蒙鄭樵曰據予本予
我之予又為賜予之予樵疑此當言台朕陽予也謂
我也賚畀卜予也謂與也以二字同文故誤耳其說

亦通

肅延誘薦餞晉寅蓋進也注寅未詳○臣照按書皋陶

謨同寅協恭今以寅為敬義則同寅即是協恭不須
複說若作進解則同進而協恭于理為長

咼咼皇皇藐藐穆穆休嘉珍禕懿鑠美也○石經禕作
禕張衡東京賦漢帝之德侯其禕而註美也

開關雍雍音聲和也○鄭樵曰據二文一義者皆當在
釋訓部恐誤在此

從申神加弼崇重也注神所未詳○臣照按神又作神

與伸同集韻伸物長也伸申也易繫辭曰神而明之存乎其人又氣之申者為神

擎斂屈收戢蒐裒鳩樓聚也○鄭樵曰蒐通作搜樓通作樓

壑阮阮滕徵隍源虛也注滕徵未詳○鄭樵云阮有二

文無義其一為行者耳臣照按滕易咸卦滕口說也

騁虛辭為滕其口說則滕有虛義

恙寫惺盱繇慘恤罹憂也○鄭樵曰繇通作搖詩王風
云中心搖搖

倫勩卽勩勤愉庸瘁勞也○石經勩作勩鄭樵曰愉心
勞也或云愉卽瘁也

勞來強事謂翦篲勤也注翦篲未詳○鄭樵曰來賚也
謂賚其勤也強勉也事有所事也翦篲未詳

臣照按

左傳戎子駒支曰我諸戎除翦其荆棘驅其狐狸豺
狼以為先君不侵不畔之臣至于今不貳史記列傳

騶子適趙平原君側行襍席如燕昭王擁篲先驅除
翦擁篲皆古人服勤之事故曰勤也

祿祉履戩袂禧褱祜福也注詩曰袂祿康矣褱禧書傳
少見其義未詳○臣照按今詩作茀祿爾康矣然則

茀袂古通也褱張衡東京賦祈褱襍災禧通釐賈誼
傳上方受釐宣室注言受神之福

嚆幾哉殆危也注嚆哉未詳○臣照按禮禮運鳳以為

畜故鳥不嚆注嚆又作猶驚飛貌疑嚆與嚆同哉禮

記中庸裁及其身者也詩大雅召旻篇不裁我躬然則裁固危義

治肆古故也注治未詳○鄭樵曰治疑為始

肆故今也○鄭樵曰此各隨詩書之文有其義故展轉釋之

埤竺腹厚也○竺鄭樵作竺注竺與篤同古文工即馬字

鞠訕溢盈也○鄭樵曰訕無盈義但引文耳

訖徽妥懷安按替戾厖廢尼定曷遏止也注徽未詳○

臣照

按易坎卦繫用徽纆說文徽三糾繩也玉篇徽

大索也然則徽有止義

豫射厭也注豫未詳○

臣照

按書太甲王懋乃德視乃

烈祖無時豫怠然則豫有厭義鄭樵曰豫怠也射即
斃也

桔梗較頤庭道直也○

臣照

按郭注云皆正直也而邢

疏未申其說鄭樵曰桔未聞今考禮緇衣引詩有桔

德行射義棲皮曰鵠注鵠之言桔桔直也言人正直
乃得中也梗木之正直者周禮天官女祝以時招梗
檜檜以除時疾鄭樵曰梗即鯁亮之鯁較詩衛風淇
澳篇猗重較兮注兩轎上出軾者廣韻與校通集韻
豆中央直者為校鄭樵曰較所謂較然也頤說文狹
頭頤也當是彊項不屈之貌道王應麟詩攷周詩周
道挺挺又小雅大東篇周道如砥其直如矢然則皆
有直義

弼裴輔比備也注書曰天威裴忱○臣照按今本作天

畏裴諶威畏通用如洪範威用六極史宋世家引作
畏用書天明畏即明威詩蠻荆來威畏也陸本忱作
諶

昌敵彊應丁當也○陸本彊作壇

嗟咨嗟也○鄭樵本嗟作髻

閑狎串貫習也○陸本貫作慣

拒拭刷清也○鄭樵曰拒即振也

鴻昏於顯間代也注於義未詳○臣照按鴻昏於顯四

字為句間代也三字為句古字於同烏歎辭曰於戲
亦曰烏虜可驗於篆文本象烏形今但以為歎辭及
語辭遂無以為鴉烏字者矣鴻以秋來以春去故曰
昏烏以曉鳴以暮集故曰顯間代之義也

衛蹶假嘉也注詩序曰假樂嘉成王也餘未詳○鄭樵
曰時俗訝其物則曰衛蹶與衛亦不相遠但方俗語
有差耳

棲遲慙休苦歟歟四息也○石經慙作慙

郡臻仍廼侯乃也注廼即乃餘未詳○鄭樵曰臻重至也侯維也維亦乃也乃引詞也不絕之義也

歷傳也○

臣照

按上文云歷秭算數也又申之曰歷數

也傳與數同五經文字曰較經典相承隸省作數書
舜典敷奏以言前漢書宣帝紀傳奏其言注師古曰
傳讀曰敷詩商頌長發篇敷奏其勇大戴禮作傳奏
其勇敷傳通用者多矣此即蓋申上文之義謂天官

家之法從一而衍之至于萬億及秭有數義焉郭注
邢疏以附近解之似失其意

艾歷覲胥相也注艾歷未詳○鄭樵曰艾即乂也察乂
治也歷編閱也胥共視也皆有相視之義

乂亂靖神弗渥治也注神未詳○臣照按王應麟詩攷
戰國策引小雅菀柳篇上天甚神無自瘵也今文作
甚蹢然則神有治義

際接翼捷也疏翼者未詳○臣照按翼說文捷也飛之

疾也按六書正譌翼別作翼所甲反捷也集韻又與
霎雪同左思吳都賦靱雪驚捷注靱雪走捷貌馬融
廣成頌雪爾電落亦言捷也俗語謂瞬息為一雪

馘穢獲也注獲禾為穢○陸本獲作穫

元良首也注良未聞○鄭樵曰元從上從人其文象人
身之首也良未聞

臣照

按書太甲一人元良故曰首

也元良二字連讀郭鄭邢俱讀斷遂致良不得為首
義

賡揚續也注揚未詳○

臣照

按書曰賡揚文武之光命

盖正釋此賡揚字言賡揚即繼續也郭邢皆讀斷遂致揚無續義

貉縮綸也○

臣照

按縮釋器繩之謂之縮之注縮者約

束之博物志綸似宛轉繩然則此貉字當作絡字解絡亦纏繞束縛也郭注云今俗語亦然然則貉縮二字亦應連讀北魏顏之推家訓引時諺有絡索阿姑餐之語則貉縮誠古諺字轉為絡索耳不應音陌

求首在卒就終也注詩曰嗣先公爾首矣成就亦終也
餘未詳○陸本求作殂終作殂鄭樵曰求下武世德
作求卷阿云嗣先公爾首矣在未詳臣照按嗣先公
爾首矣詩經作似先公首矣無爾字在當是詩小雅
小弁篇天之生我我辰安在之在

爾雅注疏卷一考證